

## مقدمة

كل حاجة بتحصل في حياتنا هي رسالة، أو يمكن جواها رسالة... لو أخذنا بالناس منها وفهمناها هنكون مرتاحين، حاجات كتير هتتحل مجرد ما ندرك الرسالة دي ومهمتها في حياتنا إيه... يمكن تكون ناتجة عن موقف قاسي، ويمكن تفضل توجع فينا لحد ما توصلنا ونفهم أن الوجع ده كان علشان نتعلم مانقعش فيه تاني... إيه ممكن يحصل في حياة محمد وبسنت عشان يفهموا رسايل ربنا ليهم؟ هيعانوا من إيه لحد ما يفهموا؟ هل فعلاً قادر الحب الحقيقي يغير واقع الحياة في عيون شخص فاقد الأمل؟

في بداياتي مع الفيس بوك كنت زي اي حد لسه بيتعرف علي وسيلة التواصل دي جديد، فكنت بقبل الأد من اي بنت، ما أنا برضه عارفة أخلاقي فين فماكنتش بقبل ولاد، المهم أن من ضمن البنات دول أتعرفت علي بنت أصغر مني رغم أنني كنت وقتها لسه في تانية ثانوي، بس برضه كنت بحس أنني كبيرة عنها، كنت بحكيها كتير عن حياتي وبنفضل للصبح نتكلم، كنت وقتها مجروحة عاطفياً جرح عميق طبعاً بالنسبة لسني وأولي مشاعري اللي يوم ما استخدمتها حببت شخص لمدة سنه من غير ماشوفه غير مرة واحدة!! فضلت أحب فيه سنه كاملة من غير ما أشوفه تاني أو أعرف عنه حاجة لحد ماظهر تاني وهنا كان الجرح العميق أن زاد حبي ليه وفضلت أحبه من بعيد لبعيد لحد ما أكتشف وبعد عني فأنا أنجرحت فاتصاحبت علي مريم اللي من علي الفيس بوك دي جامد وكنت بحكيها..

لا كنت أعرف شكلها، ولا بلدها، ولا سمعت صوتها، ولا حتي فاكرة عنها حاجة غير أن اسمها مريم وأصغر مني بسنتين وحاطة صورة البروفایل بتاعتها صورة خضرا ومكتوب فيها كلام ديني...

لما كنت بحكيها كانت بتبقي مستمتعة جداً وهي بتقرألي كأنني بحكيها حكاية، كل ما كنت بوقف كلام كانت بتطلب مني أكمل بلهفة لحد ما في يوم قالتلي

"أنتي طريقتك حلوة اوي في الحكي يا بسنت، أنتي تقدري تكتبي قصتك دي كأنها رواية، بتعرفي توصفي التفاصيل واحساسك والأشخاص والملاح بشكل شاددني جداً"

وقتها رجعت أقرأ الشات من الأول وأشوف كلامها ده حقيقي ولا لا، وبالفعل لاحظت أنني بعرف أعمل اللي قالت عليه ده لما قرأت كلامي كشخص تاني غيري اللي بيحكيه واستمتعت!

فكرت وقررت أجرب أكتب وجبت اجنده قديمة كانت عندي وبدأت أكتب فيها، ومن هنا قدرت أكتشف موهبتي في الكتابة، بالفعل يومها كتبت أول فصل من أول رواية ليا وجريت علي شات مريم كتبتة ليها واستنيت رأيها

بلهفة، كنت متوترة اوي بس فرحانة، الفصل عجب مريم جداً وشجعتني أكمل وفضلت يومين أقفل علي نفسي وأتخيل، واسرح، وارتب الأحداث في دماغي وبعدين أمسك القلم وابدأ اكتب في الأجنده وبعد ما أخلص أبعث لمريم...

لحد ما في يوم بفتح شات مريم لقيت أسمها مش موجود ومكتوب مكانه مستخدم فيس بوك! أستغربت وخفت أوي حاولت أقفل نت وأفتحه تاني لكن اسم مريم مابير جعش!!

استنتتها يومين ترجع ومارجعتش، سنه ومارجعتش، سنين ومارجعتش... ما عرفش ده حصل ليه؟ وليه فجأة؟ بس أهو حصل

النهارده دي السنه الثامنة علي إختفاء مريم، أو ممكن نقول أنتهاء رسالتها في حياتي والنهارده كان حفل توقيع روايتي الثالثة علي التوالي اللي من غير دخول مريم المجهول لحياتي ماكنتش هوصل لهنأ .

من سنين كان عندي صديقتين والأثنين صحاب أوي لبعض، تشوفهم تقول اخوات، كنت بحب أوي علاقتهم ببعض وكان الكل في المدرسة عارف مدي قريبهم لبعض، كنت أنا صاحبة للأثنين بس عمري ماكنت بمكانة واحدة فيهم للتانية وعمري ما حاولت احط نفسي في المكانة دي؛ لأنني بقدر علاقتهم جداً، لما كنت بلا حظ أن في خلاف بينهم كنت بحاول اصلحه لحد ما يرجعوا كويسين مع بعض، كانت لما واحدة تكون في محنه وأنا اشوف إن التانية مش معاها كنت بجري من وراها أقولها تقف جنبها وكانت بتروحها فعلاً أو تكلمها وكنت بلا حظ التغيير اللي في نفسيتها للأحسن وبفرح...

مرت السنين والأثنين بعدوا عن بعض بعد خلافات كتير وأنا كنت لسه في حياة الأثنين، الأولي وقفت جنبها في كل كبيرة وصغيرة في حياتها وكنت بعاملها زي بنتي، لما كنت ببقى راجعة من الجامعة بليل متأخر وتعبانة جداً كنت بنزل من العربية بدري عند بيتها وأجبلها شوكلاتة وأروح افاجئها، وأقعد معاها، وأسمع أخبارها، وأتناسي التعب والإرهاق بتاع اليوم في الوقت اللي بقعه معاها، ويوم ما أحتاجتها ومالقتهاش جنبي وعاتبته بمحبة

هاجمتني واذنتني بكل الكلام الجارح اللي وصلني أني لو سمعت اسمها في يوم جسمي يتنفض وأتوجع...وأفترقنا

التانية قربت منها زيادة لما لقيتها لوحدها وفي محنه، وكنت بتابعها في كل لحظة، ومهتمة بكل تفاصيلها، بتحايل عليها عشان الدوا والأكل واسليها وقت ملها في الشغل، وأسمعها، وأواسيها، وأحاول أفرحها كأنها بنتي برضه، كانت لما بشتكيلها من صاحبتنا الأولى وكلامها ليا تحكي لي هي عنها مساويء كتير وتقولي أن صاحبتنا دي قلبها أسود، ومؤذية، وتزود السوء اللي جوا قلبي ناحيتها، وكنا كويسين جداً مع بعض لحد ما سوء تفاهم بسيط بينا حولته لمهاجمة وخلاف كبير وسع بينا طلعتني فيه عمري ماكنت جنبها!!

بعد فترة من معاناتي النفسية وكسرة نفسي بسببهم شوفتهم متصورين في خطوبة صاحبة لينا وحاضنين بعض ومنزلين الصورة وبيلقحوا عليا أنا بكلام سيء وبيحبوا في بعض!

كان وقت الموقف ده حياتي مفتوحة جامد وجواها ناس كتير اوي باسم الصحاب، وكلهم كنت بعاملهم بالمحبة اللي في قلبي من غير ما أتوقع السوء والأذية من حد وكنت يومياً بتتذني من الصحاب، الموقف ده خلاني أقفل علي نفسي، وقلبي فترة طويلة جداً وأراجع مين الصح ومين الغلط في حياتي وهنا أكتشفت كم ناس كبير مزيفين في حياتي زي اللي فاتوا وقدرت أمحيهم من حياتي وفعلاً لاحظت ان نفسي ارتاحت بعد ما نقيت الكام حد الصح اللي في حياتي ووقفتها عليهم بعد ما خرجت الباقيين وطبعاً ما كنتش هعرف مين الصحاب الصح من الغلط الا لما أفهم الأول يعني إيه صاحب حقيقي ويعني إيه صاحب مزيف! وده ماكنتش هفهمه إلا من موقفي مع البنين دول قبل مايمشوا نهائي من حياتي.

كنت ديماً بهزر مع الناس بالدعاء السيء من غير ما أركز إن ده دعاء يعني ممكن يتحقق، زي مثلاً "يخربيتك"، "الله يحرقك" وهكذا...لحد ما في يوم كنت في المترو وقابلت بنت منقبة عينيها جميلة جداً وباين من تحت النقاب أن هيكون ملامحها حلوة جداً، فتوقعت أن هي لابسة النقاب تفادي للفتن أن حد يشوف جمالها فيتفتن بيها وهي تاخذ سيئات، أتكلمنا أنا وهي كتير وبصراحة ما قدرتش ما أعبرلهاش عن مدي إعجابي بعينيها وفضولي

إني اشوف ملامحها، لاحظت إن بعد ما قتلها كده البنت عينها لمع فيها حزن خضني، وحسيتها توهت فمارضتتش أتكلم معاها ثاني في الحوار لحد ما جالي تليفون، كانت أختي بتحكي لي موقف حصل معاها فضحكت وقولتها في وسط الكلام "أتوبيس سياحي فاخر يعدي عليكى .."

ما كملتش الجملة ولقيت البنت المنقبة بتنفعل وتصرخ فيا، من الخضة قفلت السكة في وش اختي وبصيت للبنت لقيتها بتزعقلي وتقول لي حرام عليكى ليه كده؟

كرد تلقائي مني عرفتها إني بهزر، لقيتها بتقول لي اللي وجعني وخلاني انتبه أي كان ممكن أأذي اختي فعلاً، أو أي حد ثاني، قالتلي:

-الدعاء، مافيش فيه هزار، الجملة لو لو باب الأستجابة مفتوح تتحقق بالحرف، أنتي كان ممكن تخلي أختك يحصلها زي ما حصلي، أنا ربنا رازقني الوجه الحسن والحمد لله علي كل شيء، في يوم صديقة ليا في وسط هزار اتجملت في ملامحي وقالتلي قومي من قدامي بدل ما ادعي عليكى تولعي دلوقتي، ومافيش دقيقتين بعد ماضحكنا علي كلامها قمت أعملها حاجة سخنة تشربها النار مسكت فيا ما تحرقش فيا غير وشي..

رفعت النقاب وشوفت معاني الأسى في لحظات رؤيتي لملامحها اللي انتشوهت، من وقتها وانا بحافظ علي كلامي عشان احافظ علي الناس...

كل ده ومواقف تانية كتير في حياتي فهمتني حاجة مهمة أوي، فهمتني أن كل شخص بيدخل حياتنا بيدخلها عشان ربنا مديله رسالة يديهالنا ويمشي، أو درس يعلمه لينا وبعد ما نتعلمه ويخلص الدرس يمشي، ممكن مايقاش عارف رسالته في حياتك، وانت ماتبقاش عارف رسالتك في حياته، بس في النهاية أنتم مجرد رسايل لبعض وهنتتهي، يا تبقي مؤقتة فنتتهي بعد فترة، يا تبقي ابدية وتنتهي بموت حد فيكم...

عشان كده أنا مابقتش أزعل علي فراق حد، ولا خروج حد من حياتي..

حطت بسنت نقطتين في اخر كلامها في البوست، وبصت عليه بصة أخيرة وهي بتشرب من فنجان قهوتها اللي قرب بيرد، وبصت للشات اللي متعلق في شاشة تليفونها بيعلن ليها عن رسالة مستننية منها إجابة، من غير إهتمام ضغطت علي كلمة نشر واستنت لما البوست أتحمل علي صفحتها ودخلت علي الشات اللي مستنيها وقرأت آخر رسالة فيه والتي كانت

"احنا ما ينفعش نكمل مع بعض...."

كتبت في خانة الرد وهي بتشرب من الفنجان آخر شوية قهوة فيه

"طالما ده قرارك أنا مش هراجعك فيه، ربنا يوفقك في حياتك...باي"

بعثت الرسالة وأتأكدت أنه قرأها وضغطت علي كلمة حظر وفي خلال ثواني ظهرت لها قائمة الأشخاص المحظورين وأسمه اصبح أولهم، قفلت النت وعلت المزيكا في سماعتها وغمضت عينيها لحد ما راحت في النوم..

صحبت بسنت مفزوعة كالعادة علي صوت والدتها بنزعق جامد وصوتها مخترق صوت الأغاني اللي في سماعتها، حاولت تفتح عينيها لكن قوة الأضاءة اللي والدتها فتحتها في الغرفة منعتها، غمضت عينيها تاني بسرعة وشالت السماعه من ودانها وقالت لها بعصبية وتكشيرة:

-أقفلني النور ده طيب..

صرخت فيها والدتها بعصبية ونفاذ صبر وقالتلها:

-نور إيه اللي أقفله، دا أنا هكسر الأوضه علي دماغك..فسختي خطوبتك مع عادل؟ عملتي اللي في دماغك يا بسنت! خليكي عانس يابسنت، خليكي قاعدة واللي أصغر منك عندهم عيال، 25 سنه ومش عارفة تستمري مع حد اسبوعين؟ عادل كان آخر واحد كويس ممكن يرضي بيكي وهو كمان طفشتيه..

رمت جسمها علي السرير بنفاذ طاقة وإجهاد، تعبت من سماعها لنفس الكلام كل يومين، تعبت من أن مافيش حد من اللي حوالها فاهمها ولا حاسس بيها، كلام والدتها بيرن في ودانها وبيكربح شعورها لكن مافيش عندها قدرة تانية للجدال، مش باقي ليها ولو شوية صبر صغيرين تدافع بيهم عن نفسها عشان كده كلامها طلع منها ببرود استنفز والدتها:

-دي حياتي يا ماما بعد إذنك سيبيني أعيشها زي ما أنا عايزة...

انعصبت والدتها أكثر والحزن المرة دي اتملك من قلبها ماقدرتش تمنع دموعها اللي نزلت من عينيها وسط الزعيق:

-لا يابسنت مش حياتك، ومش هنسيك تاني تعيشها لواحدك؛ أنا لما سيبتك تعيشها لواحدك من خمس سنين فاتوا أنتي شوفتي وصلتنا لفين دلوقتي...مش مسمحاكي يابسنت لو كنتي لسه بتحبيه...

خرجت والدتها وقفلت باب الغرفة بقوة ورغم القوة دي ماتفز عش منها بسنت؛ لأن قوة الجملة الأخيرة من كلام والدتها غطي علي أي شعور تاني جواها، فتحت عينيها فجأة بعد الجملة مش مهتمة للضوء اللي ازعجها من دقايق، فاردة دراعتها وجسمها ومركزة في فراغ سقف الغرفة وجواها سؤال بيتردد

\*هو أنا مش قادرة أفتح قلبي لحد تاني ولا أمن لحد تاني عشان لسه بحبه؟\*

\*\*\*

- لا يا بسنت أنتي بتهزري أكيد ! لسه بتحبيه بجد بعد كل اللي عانتيه منه ومعاه ده؟

كانت بسنت متوقعة رد الفعل ده من آلاء صديقتها لما تسمع الكلام اللي بيدور جواها، بس ماكانتش مجهزة رد لأن هي نفسها مش عارفة الإجابة وعشان كده أتصلت بيها تدور علي إجابة معاها، دفنت بسنت وشها بين كفوف إيديها وقالت لآلاء اللي زهولها مسيطر علي سكوتها بعد السؤال اللي سألته:

-آلاء ما تجننيش، أنا بكلمك عشان أقولك اللي داير جوايا وبحاول أفهمه، أنا مش بقولك أنا لسه بحب عبدالرحمن، أنا بقولك هو ممكن يكون اللي أنا فيه ده بسبب كده؟ أنا بسألك انتي شايقة إيه؟

بتسمعها آلاء من ورا سماعة التليفون وهي مش مطمئة، خايقة من السيرة دي لأن مجرد وجودها بيقول أن في معاناة كبيرة المفروض أنهم تخطوها



سوا رجعت تاني، مجرد ذكر عبد الرحمن ده معناه ان اللعنة لسه موجودة، معناه أن في دوامة تفكير وتعب بسنت هتتحط فيهم تاني، هي بتسمع ومش لاقية رد تظمن بيه بسنت لأن هي نفسها مش مطمئة..

اتنهدت آلاء بقوة وقامت قعدت علي سريرها وقالت لبسنت:

-بصي يا بسنت، أنا عارفة أنتي عانيتي ازاي في علاقتك بعبد الرحمن، وكنت متأكدة من الأول انك مش هتخطيها بسرعة، ومش سهل تفتحي قلبك لحد تاني، وعارفة انك اتطفيتي، وأتغيرتي للأسوء، وحياتك أخذت منعطف مؤذي مش شبيهك واحنا مش عارفين نرجعك تاني لبسنت اللي عارفينها، لكن أنني أتوقع أو أفكر للحظة انك لسه بتحبيه دي مستحيل، فأنتك تيجي دلوقتي تسألني سؤال زي ده بعد كل المرحلة الطويلة من المعاناة اللي تخطيتها يبقي انتي كده بتهزري، أحنا كده كأننا ماعملناش حاجة..

ردت بسرعة بسنت وهي بتخبط جبينها بكفوفها:

-ليبييه يا ست أنتي؟ ليه كأننا ماعملناش حاجة؟

بصوت حزين وخزلان جاوبتها آلاء:

-لأنك بعد 3سنين قرف وسنتين محاولة تشافي لسه مش متأكدة أنك بطلتي تحبيه...

ماكنش في كلام يتقال تاني، كل حاجة جواهم ساكتة وبتحاول تستوعب، قررت بسنت تقفل مع آلاء المكالمة بحجة أنها هتروح تلبس عشان تروح الشغل، لكنها في الحقيقة كانت بتهرب لنفسها ولذكرياتها عشان تحاول تفهم... هو في إيه؟

لبست هدومها وعقلها مابطلش تفكير، أخذت شنطتها وبصت في ساعة إيديها، حمدت ربنا أن المدرسة اللي بتشتغل فيها مسائية وإلا بتأخيرها ده كان زمانها مرفودة من أول أسبوع، خرجت من البيت وسرعت في خطواتها علي أمل أنها تلحقهم قبل ما يخلصوا طابور الصباح ولكنها وكالعادة وصلت في منتصف الحصاة الأولي، بكل خجل وزهق قابلت غضب مدير المدرسة للمرة المليون من وقت ما اشتغلت من شهرين في

المدرسة دي، مضت حضورها وهربت بسرعة لغرفة المدرسين وقفت قدامها تتفرج علي فراغ فناء المدرسة من ورا السور الحديدي اللي سائدة دراعتها عليه وسرحانة...

عبدالرحمن كان أول علاقة حب عاشتها بسنت في سن العشرين، بسنت وقتها كانت البنت اللي مش سهل حد يعرفها وماينجذبش ليها، جمالها الداخلي بيزيد من جمالها الخارجي وسحر ضحكتها روحها الحلوة المبهجة، حماسها ودقتها، طموحها، طيبة قلبها وحنيتها، غموضها وخيالها الواسع، ومواهبها الكثير... كانت شخصية ليها كاريزما مش طبيعية لما كانت تدخل حياة شخص ماينفحش حياته ماتتغيرش للأحسن، وده بالظبط اللي حصل مع عبد الرحمن من بداية معرفته بيها من علي جروب دفعتهم في كلية التربية علي فيس بوك، رغم أنه فضل شهور يكلمها من غير مايعرف شكلها، إلا أنه حبها، حب البهجة اللي دخلت حياته بمجرد وجودها، حب أنه معاها اتغير من شخص حياته سوده لشخص مدرك لحلاوة الألوان، قدرت تعرفه أزاي يخلق سعادته مايستتناهاش، ويحب نفسه اللي كان كارها وبسبب كرهه ليها باعد عن الناس... زي ما قدرت تخليه يبقي من ضمن الناس ومايبقاش وحيد، اتحولت ملامحه من الكأبه والحزن لابتسامة عريضة وعيون بتلمع

حبه هي مع الوقت رغم أن لا شخصيته ولا ملامحه فيهم حاجة من مواصفات فارس احلامها اللي عاشت تحلم بيه، جه اليوم اللي شافها فيه واللي من بعده اتغير كل شيء في العلاقة، اليوم اللي شكلها البسيط وعيونها اللي مش ملونة، وجسمها الرفيع، وبشرتها القمحاوية خالفوا الصورة اللي كانت متكونالها جوه خياله... هي حبه كامل، لكن هو حب فيعا اسباب...

مع الوقت قل اهتمامه لحد الانعدام، في اوقاتها الصعبة عمرها ماشافت الخوف الحقيقي عليها اللي كانت مستنياه، بل كان بيلومها ويتهمها ديماً بالضعف والكأبه، كانت ديماً تحس معاه بأنها قليلة، او أنها مش موجودة في حياته، 3 سنين بيكرها في شكلها، بيتهمها بالضعف، بيخونها ومع أقرب صاحباتها ويتعرف وتتوجع وتعدي، كان موصلها طول الوقت انها مش مكفيا... عملت كل شيء يرضيه حتي لو مايرضيهاش عشان بس يفضل معاها ويحبها زي مايتحبه، لكن ماكنش في شيء عاجبه، بعد عنها كثير ويرجع بعد البعد اللي كسر جواها حاجة حلوة وتستقبله بكل محبه وعشان يتحبه بجد... بترجع...

قالتله في مرة أنا هفضل اسامح وأعدي لحد ما استنزف كل طاقتي بس هتيجي مرة أخيرة مش هقدر أعمل أي حاجة غير اني أمشي ومارجعتش... ومارجعتش..

سنتين بتحاول تتعافي من كل الكسور اللي سابها ليها لكن مافيش أي وسيلة نافعة معاها، وتحولت بسنت لشخص مأذي بيئذي، شخص عملي ماعندوش مشاعر ومش قادر يحس غير بالخزلان، شخص كاره نفسه وشكله والناس، شخص بيقرف من كل شيء ذكوري، شخص بيجلد نفسه كل يوم ناسي معني النوم المريح...

أتحولت لشخص ساكت، مطفي، ديماً لوحده خايف ومن بره جامد الكل منه بيخاف، وسط احتياجها الكبير للحنية والطبوبة وبكائها ليالي كثير من الوحده كانت فاتحة حياتها حفلة من غير دعوة، اي حد يدخلها وهي تتفرج عليه من بعيد، يدخل يكسر حته منها ويخرج وهي لسه مكانها....

مس بسنت، يا مس بسنت!

اتفزعت بسنت لما انتبهت أن جرس الحصة الثانية بيرن، وفي صوت حد جاي من وراها بينادي، التفتت وملاحها مرتبكة، شافت مستر محمد مدرس العلوم في المدرسة واقف وراها علي مسافة قريبة منها ومادد إيده ليها بكوباية نيسكافيه ومبتسم كعادته! هي مش مستوعبة الموقف، ومش فاهمة مين كوباية النيسكافيه دي وفي إيها، وعلي ملاحها كثير من علامات الإستفهام جاوبها عليها محمد قبل ما تسأل، وقالها بنفس الإبتسامة وبارتباك:

-أنا شوفتك واقفة شكلك مرهق ومش فايق وجاية متأخر ومش مركزة حتي مع جرس الحصة الثانية اللي المفروض تطلعها حالاً فقولت أعمل لحضرتك كوباية نيسكافيه معايا واقولك أن جدولي فاضي دلوقتي وأقدر أطلع بدالك الحصة وانتي تقعد تترتاحي وتشربي النيسكافيه...

ولو حابة ممكن تطلعي تشربيها في المعمل وتشاركينا الحصة بوجودك  
عشان المدير يعني مايعضبش منك...

مجرد ما شافته وسمعت نبرته الغريبة اللي بيتكلم بيها أرتبكت أكثر  
وخافت، أكثر شخص في المدرسة بتهرب منه بيظهر لها من كل جهة،  
أصبح الوضع مش مريح من محاولاته للتقرب منها واللي الكل محظريها  
منه ومن محاولاته

-شكراً، انا هطلع الحصة.

اخذت شنطتها، ومن غير ما تستأذن مشيت من قدامه بسرعة وهو باصص  
عليها من مكانه بزعل، وقفت مرة واحدة علي بعد خطوات منه ومازالت  
مدياله ضهرها، فرح لما توقع أنها هتلتفت وتعتذرله، لكنها ما عملتش كده،  
هي طلعت تليفونها اللي هو مالحظش أنه بيرن وردت وهو متابعتها  
بفضول...

-الو...

سكنت دقيقة وهو لسه متابعتها، صرخت مرة واحدة ورمت شنطتها وجريت  
وهي بتعيط، حط كوباية النسكافيه علي السور وحاول يلحقها وسط عيون  
المدرسين والطلاب اللي اتجمعوا عشان يعرفوا مصدر الصوت منين لكنه  
مالحقهاش..

-السلام عليكم...-

كل الموجودين في غرفة المدرسين سكتوا وانتبهوا لصوت محمد لما ألقى عليهم السلام أول ما دخل، بصوا له بفضول وعلي وشوشهم تساؤلات متراكمة من أمبارح، بعض المدرسات مش مستغربين لأنهم متوقعين موقف محمد أمبارح، هما عارفين أنه شخص لعبي، حياته مليانه علاقات فاشلة ومن الواضح أنه شخص يبحب يتسلي بأي بنت سواء شدته أو لا، مافيش حد في المدرسة مايعرفش كده عن محمد، برغم انطوائه وانغلاقه في علاقاته معاهم رغم أنه شغال معاهم في المدرسة من 3 سنين، إلا إن الكل عارفين علاقاته القديمة اللي ماكانتش بتكمل أسبوعين علي بعض...-

وكلهم ملاحظين نظراته، واهتمامه، وتغيره من بداية دخول بسنت للمدرسة تشتغل معاهم، فأكيد أول واحد كان بيحاول يكون معاها أمبارح هو محمد...-

سأله فتحي مدرس الرياضيات وهو بيطبق سندوتش الفول نصين وييدخله جوا بوءه يقطم قطعة كبيرة تخرج الفول من جانبيين شفائيه فيلحسهم بلسانه، مما استدعي محمد يحس بالقرف وهو باصص ليه بملامحه المجهدة:

-ألا أنت جاي متأخر وشكلك تعبان ومانمتش من أمبارح يا أستاذ محماه،  
ألا هو كان في حاجة؟-

بصله بقرف أكثر ورجع بنظره لكشكول التحضير تاني وقبل ما يجاوبه دخلت غادة صديقة بسنت المقربة، واللي جابتها المدرسة تشتغل معاها، واللي في نفس الوقت أقرب واحدة من الموجودين لمحمد؛ ودا بدافع أنهم نفس دفعة التعيين وبدأوا مسيرتهم في التدريس في المدرسة مع بعض، راحت تجاه محمد وقالتله بود:

-أنا بجد بشكرك يا محمد علي وقفك طول اليوم أمبارح مع بسنت، مش عارفة من غيرك كنت هعمل إيه معاها لواحدي..

انتقلت عينيه لعيون كل اللي في الغرفة، باصين إيه بتركيز ومنصتين للي بيتقال، حس بالاتهام اللي بيكرهه من نظراتهم، ارتبك وبنبرة ضعيفة مخنوقة قالها:

-أنا ما عملتش حاجة يا غادة ده واجبي، أنتوا أخواتي وكان لازم أكون جنبكم خصوصاً أن بسنت بنت ولواحدها، أكيد ما كنتش هسيبها لوحدها واسيبك أنتي لواحدك معاها..

--ده عشمي فيك يا صديقي، يلا استأذنكم أنا عشان أروح لبسنت المستشفى...

\*

في واحدة من المستشفيات الحكومية بالقاهرة، قاعدة بسنت ساندة ظهرها للحائط اللي ورا سرير المرافقين اللي قاعدة عليه، مغمضة عينها، جسمها مجهد، تفكيرها هلكان، قلبها مهموم، فتحت عينها وباصه ناحية الباب لما دخلت آلاء وفي أيديها قهوة وسندوتشات، عافت عشان تبتسم ليها كتعبير منها علي الشكر، أخذت منها القهوة وبدأت تشرب فيها بهدوء، قعدت جنبها آلاء وبدأت تاكل في سندوتشاتها، بعد قطمتين بصت لبسنت وقالتها:

-أحكي لي بقي اللي حصل أمبارح، أنا عرفت من غادة أن واحد من المدرسين هو اللي كان معاكي وقت ما عرفتي الخبر وهو اللي ساعدك تيجي المستشفى وكان معاكي لحد الفجر!

غمضت بسنت عينيها ورجعت راسها لورا تسندها علي الحائط، بصمت  
بتحاول تجمع أفكارها وتميز مشاعرها من وسط دوشة المشاعر اللي  
حساها، وكركة الأفكار والأحداث المتداخلة من وقت الحادث..

-بسنت أنتي معايا!!

أتهدت بسنت وبصتلها بضعف وشربت شوية من القهوة وقالت لها بصوت  
ضعيف وملامح حيرانة:

-أنا الخبر جالي وأنا طالعة الفصل وهو كان واقف ورايا وقتها، اتصلت بيا  
جارتنا وقالتلي أن ماما كلمتها تروح لها عشان هي حاسة أنها مش كويسة،  
ولما راحتها وقعدت معاها أغمي عليها وحاولت تفوقها بكل الطرق  
ماعرفتش فكرتها ماتت، صوتت ولمت العمارة لحد ماجابوا دكتور وعرفوا  
إنها غالباً غيبوبة سكر فاتصلت بيا...

صوتت ومادرتش بنفسي إلا وأنا برمي شنطتي وبجري، قبل ما أخرج من  
المدرسة وقفني وفضل يسألني وأنا أصلا مش بطيقه، كنت عايزه اشتمه إنه  
معطلني واجري، بس ماعرفش ليه لقيتني بقوله ماما تعبانة وبسببي...

قطمت القطمة الأخيرة آلاء من السندوتش وهي بتسأل باهتمام:

- وهو عمل إيه؟

بصت ليها بسنت بتركيز وهي بتسترجع الأحداث في خيالها وبدأت  
تحكي...

\*

بدموع وملامح خائفة وجسم بيتنفض من الرعب، وبنبرة مليانه إحساس  
بالذنب قالت بسنت:

-ماما تعبانة وبسببي..

من غير تردد محمد عرض علي بسنت يكون معاها، لكنها رفضت وسابته  
ومشيت ووقفت تاكسي وركبت، بس محمد ماسبهاش وركب معاها التاكسي  
وقالها بحسم:

-ده مش وقت نقاش خالص، ياريت تسيينا نلحق مامتك...مش هينفع أسيبك  
لو احدك...

سكت لحظة وبص تجاه السواق ورجع بصلها وبنبرة هادية كمل كلامه:

-خصوصاً أنك نسيتي شنطتك في المدرسة...

استسلمت بسنت لرغبته لما أيقنت أنه صح، وأنه لو مابقاش معاها هتكون  
في مأزق أكبر، بس ماكنش ده السبب الوحيد اللي أجبرها توافق، كان في  
سبب خفي أتولد جواها لكنها تجاهلته..

بعد ما وصلوا لبيتها كانت عربية الإسعاف بتنقل والدتها، شعور الخوف  
اللي أحتل بسنت في وقتها، وشعور الندم وإحساسها إن هي سبب اللي  
والدتها وصلت له كانوا أقوي منها، هزموها والمره دي ماقدرتش تتماسك  
وتقهر دموعها...واحتلت نهضة البكاء مسافة طريق الوصول للمستشفى،  
كانت ساعات مربكة وتخلو من كل معاني الطمأنينة، لكنها تفقد  
الوحدة...دي أول مرة ماتحسش فيها بسنت بالوحدة!

أول مرة تحس أنها عاجزة عن التصرف وفي حد قدرة ترمي حمولتها  
عليه، محمد في كل لحظة وكل إجراء وكل خطوة في المستشفى كان متكفل  
بيها، حتى بعد ما غادة عرفت اللي حصل من المدرسة وراحت لبسنت  
ومحمد المستشفى كان محمد برضه اللي واقف مع الدكاترة، وبيخلص في



الإجراءات، ومن وقت للتاني كان يبص لبسنت ويبتسم وبنبرته الهادية يقولها:

-ماتخافيش يا بسنت أحنا معاكي، وكل حاجة هتتعدل بإذن الله..

بعد ما الدكاترة عملوا واجبهم، طلبوا من بسنت أن والدتها تفضل في المستشفى لمدة 24 ساعة لحد ما يطمنوا أنها تقدر ترجع البيت، وإن بسنت هتستني معاها لحد تاني يوم، الوقت أتأخر ومحمد نفسه أتأخر من وقت ما استأذن منها ينزل الكافيتريا يجيب أكل، أكثر من مرة تبص في ساعتها وتبص تجاه الباب وده لاحظته عادة فسألته:

-أنتي مستنيه حاجة معينة محمد هيجبها لك من تحت ولا إيه؟

ارتبكت بسنت وقالتلها:

-لا، أنا بس مستغربة أتأخر ليه، وعشان عايزاه يمشي كفاية عليه لحد كده..

--هو مين ده اللي كفاية عليه لحد كده؟

وش بسنت أحمر من الخجل أول ما دخل فجأة وعرفت أنه سمعها، اتصدمت والكلام اتلغبط جواها مش قادرة ترد، لحقتها عادة وجاوبته نيابةً عن بسنت وقالت:

-دي بسنت كانت لسه بتقول أنها عايزه تشكرك علي وقفك معانا النهارده يا محمد، وتقولك تروح البيت ترتاح بقي أنت عملت كل اللي عليك وزيادة..

حط الأكياس البلاستيك اللي في أيديه جنبهم علي السرير وبدأ يخرج منها سندوتشات وعصير من غير ما يبص لحد فيهم وأتكلم بجدية واحد واخذ قرار مش هيسمح بنقاش:

-أنا مش همشي عشان أنا مش بعمل واجب وماشي، أنا عارف أمتي همشي بالظبط، وأنا مش محتاج شكر لأن أي حد مكاني أكيد كان هيعمل كده وأكثر المهم أن والدة بسنت تبقي بخير.

مد أيده لبسنت بوجبتها وعينيه جت في عينيها للحظة قرأت فيها بسنت كلام وقف عنده كل إدراكها وماقدرتش تستوعبه، أتحوّلت نبرته لنبرة هادية اعتادتها منه بتربكها بس المرة دي ماخافتش منها، مدت أيديها وأخذتها منه وجاهدت عشان تطلع منها ابتسامة ليه وقالتله:  
-شكراً ...

ضحك محمد وقالها:

-شكراً دي علي الأكل ولا عشان مش همشي؟

ابتسمت المرة دي بود حقيقي وقالت:

-شكرا عشان كل حاجة أنت كنت سببها النهارده..

-- هو أنت الحاجات دي اللي أتأخرت عشانها تحت كل ده؟

بص محمد لغادة وناولها وجبتها وقالها بتلقائية استفزت بسنت وخلتها تنسي كل الحاجات الحلوة اللي شافتها من محمد طول اليوم للحظات:

-لا أكيد...أنا كنت بشرب سيجارة بس قبل ما أطلع لكم.

\*

-بس يا ست آلاء وقعدنا أكلنا وطول الوقت دماغي فيها وش كبير ومش  
مركزة معاهم ومش طايقة أسمع صوته، وعندى شعور متناقض ناحيته اللي  
هو أنت ما حدش عارف أنت كويس ولا مش كويس ولا حكايته إيه؟

-طيب وأنتي ليه شايفه انه ممكن يكون مش كويس ما الراجل واقف معاكي  
وقفة رجالة أهو..

أنتهدت بسنت بعد تفكير وقالت بحيرة:

-ماعرش يا آلاء، بس كل اللي في المدرسة حذروني منه وقالوا انه بيرتبط  
كثير ويفركش بسرعة، بتاع بنات يعني، وكمان حوار السجاير ده بيقرفني  
من أي حد أنتي عارفة، ده غير أن لما كنت بروح لغادة السنة اللي فاتت  
المدرسة قبل ما اشتغل فيها كان ليه أفعال غريبة كده وبحسه بيصلي بصة  
مختلفة عن الكل وبيعاملني باهتمام زيادة وده محسني انه حاطتني الوليمة  
الجديدة ليه....

سكتت لحظات وبعدين كملت كأنها بتسأل نفسها سؤال محيرها ونفسها حد  
يجاوبها عليه:

-بس أنا في حاجة غريبة أكثر هموت وأفهمها....

بصنلها آلاء باهتام، ونظرلها مللانه فضول وسأللها:

-حاجة إله دل؟

سرحت بسنت بعينلها فل الفراغ قدامها كأنها بتسفرع أحداث من ذاكلها وقاللها:

-مسفربة جداً لغادة وعلاقلها بمحمد ده، الناس كلها بقلول عن محمد كل اللل قللهلوك ده وأجل أشوفه من نظرلهم إله اقرف منه بجد واتخقل اما أسمع سفرلته، بس لما بألكم مع غادة عنه بحس أنها بلكمني عن شلل عن ثانل، كل كلامها عنه بقلول قد إله هو شلل جلع، وطموح، وأن قلبه طلب وحنلن وجواه طفل، وببلاف ربلنا فل تعامله مع أي حل...حقلل بسفر..

--طيب وأنل إله بسفرل ما يمكن غادة بقلبه عشان كده شلفاه غير الناس؟

اعقلل بسنت فل جلسلها ووجلل نظرلها قلها آلاء وقالل بكل بلل:

-مسقلل يا بنل، أنا كنت مقلره زلك كده فل الأول، بس من معاشرل لغادة وسؤالل إله فل مرة فأقلل أنه بالنسبالها ألل جلاً خصوصاً، أنل عرفل أنها فل كل علاقلته كانت معاه ومعاصراها، وغادة حرفياً عمرها ما قبل حاجة عنل...عموماً بابلر النهارده بقلوس بكره ببلل ببلاش، المهم عنل حالياً أنل ارل له جمبله عللا وخلصنا علل كده...

--فقلرل هلجل النهارده واحنا مروحلن طنط البلل عشان بللن جللك؟

الجملة دقت جوا قلب بسنت بنبضة غريبة عنها، مش مفهومة بالنسبـالها لكنها فيها أمل بتحاول ترفضه، أو يمكن احتياـج بتدفعه جواها، قالتها كأنها بتقنع نفسها برفض الفكرة قبل ما تقنع آلاء:

-ماعتقدش، هو عمل اللي عليه زي أي شخص مكانه وأكد يعني ممكن يتصل يطمن بس أو يبعثلي مسـدج علي الفيس لكن يجي تاني دي ماعتقدش... المهم سيبك أنا هنام شوية قبل ما أصحي ماما عشان نمشي.. لو فوني رن ماتصحنيش.

\*\*\*

خرج آخر سـيـجـارة من العبـة اللي لسه شاريتها من ساعة ونص وبصلها بعصبية وحيرة، متردد يولعها ولا يسيبها، حاسس بإنفعال حتي السـجـاير اللي مهمتها طول سنينه اللي فانت انها تهديه مش قادرة تاني تعمل ده، الحياة بدأت تهينه أكثر من اللازم، الناس بدأت تنذيه بنظراتها وكلامها وهو تعب من أنه يتفادي، شاف الضغط النفسي بصور كثير طول السنين اللي فانت ومافيش حاجة هزته لكن المرة دي قادرة حاجة صغيرة وبسيطة تنذيه وتخوفه، المرة دي هي آخر حاجة أتمناها وعنده أمل فيها، هي آخر رجاء من ربنا نفسه يتحقق، ديماً محمد صاحب الـ29 سنة شايف نفسه حظه سيء، أو يمكن ربنا مش راضي عنه...مافيش حاجة مشي فيها وتمت، مافيش حاجة كان عايزها وحصلت، مافيش فرحة ليه بتكمل... أو حتي بتحصل...

والمرة دي أول مرة يفكر بجد، أو يسعى لحاجة وعايزها بجد مش حاطط ليها احتمال خسارة...

حط السـيـجـارة في بوءه وقبل ما يولعها بدأ يسعل جامد، وشه أحمر وعروق جسمه برزت من الألم اللي حاسه في صدره لكنه ماهتمش كالعادة ورجع السـيـجـارة لشفايـفه وولعها وشاور للأتوبيس وركب...

\*\*\*

بعد ما وصلت عادة المستشفى استقباتها آلاء في الأسترحة قبل ماتدخل الغرفة عند بسنت، بلغتها أنها نائمة وقعدوا يتكلموا مع بعض الأثنين في الاستراحة في الوقت اللي كانت بسنت جوا كل شيء فيها نايم إلا عقلها، صحيت بسنت علي حلم غريب قلبها فاق منه بينبض بسرعة رهيبه، أول حلم ماتصحاش منه وتبقي ناسية منه جزء ولو بسيط، كل تفاصيل الحلم ظاهرة قدام عينيها بصورة واضحة كأنه حقيقة، ديماً كانت بتؤمن بالرسائل وعلي الأخص اللي ربنا ببيعتها في أحلامها، قررت أنها تبحث عن تفسيره لكن لما الأمور تهدي، حاولت تهدي نفسها لكن جواها حاجة هتموت وتفهم إيه معني الحلم وإيه تفسيره؟

مرة واحدة حسيت بحركة في سرير والدتها فبصت تجاهها لقتها صحيت، قامت من مكانها وراحت عندها سألتها لو كانت محتاجة منها حاجة لكن مابتصلهاش ومش راضية ترد عليها، فالحظة دي ماقدرتش بسنت تتحمل تكتم جواها أكثر وبكت....وفي وسط بكاءها وهي واقفة قدام والدتها قالتها:

-أرجوكي بلاش أنتي كمان تيجي عليا، أنا مافيش في الدنيا دي حاجة مهونة عليا غيرك، أنتي الحنة الوحيدة اللي حنينة في حياتي، بلاش تبقي أنتي والدنيا عليا...أنا مش سعيدة، ولا عمري كنت سعيدة بالمرحلة اللي وصلتلها، بس والله مابئيدي، أنا نفسي أفرح بيا وأفرحك زي ما أنتي نفسك، بس هتفرحي بيا أزاىي لما أقبل بأي حد وخلص لمجرد أني ما ابقاش عانس، أنا مش مرتاحة ومش هعرف أقبل بوضع مش مرتاحة فيه...

بصتلها أمها بضعف ومدت ليها إيديها ومسكت كفها وقالتها بصوت ضعيف:

-أنا مش باجي عليكى يا بسنت، بس أنا خايفة عليكى ومش ضامنة عمري  
ونفسي أطمئن عليكى قبل ما أموت... عادل ابن خالتك وكنت هتطمئن عليكى  
معاه عشان حد مننا وعمره ماهيئذيكى...

قعدت بسنت علي طرف السرير قدامها ولسه أيديها في إيد والدتها،  
دموعها لسه ماوقفتش وقالتها بنبرة شخص متألم:

-مش مرتاحة معاه، مش قادرة أشوفه غير أخويا، مش قادرة أعامله غير  
كده وهو حاسس بده ومتضايق، أنا مش هقبل أظلمه وأظلم نفسي  
معاه... وأنا ماسبتوش يا ماما هو اللي اختار، هو اللي أجبرني أقوله أني  
مش قادرة أشوفه غير أخويا، ماستناش عليا حتي أحبه، كان عايزني أجبر  
نفسي علي ده وأنا ماقدرتش أبقى مش صريحة معاه وهو اللي طلب  
مانكلمش وسييته لراحته... وأنا يا ماما قتلتك ألف مرة أنا موضوع عبد  
الرحمن أنتهي بالنسبالي من سنين وحتى لو جاب كل العالم يتوسطلي عشان  
أوافق بيه مش هوافق.

--وهتفضلني ترفضني الناس وماترتاحيش لحد أمتي يا بسنت؟

مسحت بسنت دموعها وغمضت عينيها وقالت وهي من جواها بتستنجد  
بربنا:

-لما ربنا يريد أنه يعوضني.. هو أكيد مش هيخزلني..

خبط باب الغرفة ففتحت عيونها بسنت ومسح الاتنين دموعهم بسرعة،  
وقامت بسنت من مكانها بتعدل حجابها لأنه أكيد الدكتور جاي يطمئن علي  
حالة والدتها ويديها إذن الخروج، أذنت للي بيخبط علي الباب بالدخول  
فجالها صوت غادة من برا لما آلاء فتحت الباب وقلته تاني بعد ما دخلت  
وعلي وشها أبتسامة بحماس

-حلو أنك صحتي، مش قاتلك أنه هيجي... عشان بس تصدقيني لما أقولك  
حاجة بعد كده

ارتبكت وسألتها بصدمة:

-هو مين ده اللي جه؟

دخلت غادة بحركاتها الطفولية وصوتها العالي فجأة:

-ايه ده ما بسنت صاحبة أهي يا آلاء، تعالي يا محمد أدخل....

قلبها دق بنفس النبضة الغريبة وزاد ارتباكها لما شافته واقف قدامها  
بابتسامته وهدوء المعتاد، ومجرد ما شافته أفكرت كل تفاصيل الحلم وزاد  
ارتباكها، سلم عليها وعلي والدتها وهي في حالة بين الصدمة وبين التوتر  
وبين الفرحة الغير مفهومة...

تمت اجراءات الطمأنينة علي صحة الوالدة والتأكيد علي خروجها، وبعد ما  
وصلوها كلهم للبيت وأطمنوا علي والدة بسنت كانت جارتهم جهزت ليهم  
غدا وبعد مقاومة من محمد بأنه لازم يمشي واصرارهم علي أنه يستني،  
استسلم واتجمعوا كلهم علي سفرة واحدة وأكلوا...ومن هنا بدأ يكون للأكل  
طعم ثاني عند محمد...وللمه شكل ثاني أكثر سعادة عند بسنت...

\*\*\*

في اليوم الثاني، وبعد نوم طويل أفقده محمد، صحي بنشاط وابتسامة،  
بيكوي هدومه بلهفة وبيلبس بسرعة بيعد الدقايق مشتاق يجي ميعاد المدرسة  
عشان يشوفها وعنده أمل يقولها صباح الخير المرة دي وترد عليه  
وماتكشرش في وشه وماتردش زي كل مرة، طول الطريق بي فكر يقولها  
ليها أزي، بيتسم ويقولها علي طول ويسكت؟

ولا بيتسم ويقول صباح الخير أزيك يا بسنت؟

لا هو هيبتسم ويقولها صباح الخير يا بسنت أخبارك إيه النهارده وأخبار  
مامتك إيه؟



قبل ما يوصل بدقايق زارت عقله فكرة عكرت مزاجه وقلقته، هل هي ممكن تفضل مع والدتها في البيت وماتنزلش النهارده؟

وصل المدرسة وعينيه بتدور عليها بين وشوش كل المدرسات ومش لاقيةها، أفنكر أنها ديماً بتتأخر وده اداله أمل، عدت أول حصتين بدون تركيز في أي شرح ونزل من المعمل لغرفة المدرسين بمزاج متعكر بيأمل أنه يسأل عنها وحد يقوله جت لكن الكل بياكدوا أنها ماجتتش..

شاف غادة معدية من قدام الغرفة قام راح ليها بلهفة ونادي عليها، بصتله ووقفت تستقبله بإبتسامة، ماكنش عارف يسألها يقولها إيه؟ ولا يسألها بصيغة عاملة أزاى ماتدخلش الشك جواها، كان متوتر وعينيه بتروح يمين وشمال وتتفادي نظرتها وبعدين قالها:

-هي صاحبتك ماجتتش ليه؟ هي مامتها تعبت تاني ولا إيه؟

--صاحبتي مين؟.. تقصد بسنت!!

لا مامتها ماتعبتتش تاني ولا حاجة هي بس حبت تكون جنبها النهارده لحد ماتروق أكثر، وهي كمان ترتاح جسدياً، ونفسياً عوضاً عن اليومين اللي فاتوا...

جوا منه فرحة أتطفت، وزار ملامحه الحزن من جديد وقالها أنه فكر في حاجة وكويس انها بخير وسابها ومشى... لكن سلبية مشاعره مامشيتش، وهرب من كل الدنيا ومشاعره لعلبة سجايره، يشتكيلها همه..

\*\*\*

النهاردة 2017/8/6 الساعة دلوقتي 10 الصبح، المرة دي مش صاحبة عشان أجهز لميعاد شغلي لأنني هاخذ أجازة النهارده، المرة دي صاحبة عشان أتكلم معاك، أنا عارفة أني غبت عنك خلال اليومين اللي فاتوا بس

أنا جاية دلوقتي عشان أحكيلك اللي حصل معايا فيهم عشان أنا مش برتاح غير لما أتكلم معاك، ماما تعبت بسبب أنها زعلت مني، وكنت بايته بيها في المستشفى، أنا مخنوقة جداً، ونفسيتي تعبت بجد، ما حدش فاهمني ولا حاسس بتعبني، أنا فعلاً محتاجة وجودك، محتاجة أطمئن ببيك وأحس أن ليا ضهر وسند، هما ليه مفكرني أني مش عايزاك؟، أنا حياتي ناقصة من غيرك، حتي وأنا بعمل إنجازات خلال السنة دي كل إنجاز فيهم ناقصه حاجة وهي أنك تكون معايا، هو أنت مش هتجي بقي؟

ضغطت بسنت علي كلمة ارسال، استنتت لما أتأكدت انها اترسلت وعادت قراءتها وبعد ما خلصت قفلت الشات وحطت تليفونها علي الشاحن وغمضت عينيها، وقبل ما ترجع للنوم من جديد أتهدت بقوة، وأختصرت كلام كثير جواها وشعور كبير وخرجته في جملة واحدة قالتها بصوت مسموع ونامت...

-يارب بقي....

بعد ساعات اليوم الطويلة والمرهقة اللي أصر محمد يشغل نفسه فيهم شغل  
 أزيد في الدروس الخاصة والمدرسة عشان تلهيه عن احساسه وتفكيره في  
 بسنت، رجع البيت وبرضه ماحسش بارتياح، قضي ساعات الليل في  
 اللاشيء، بيفكر بيعتلها واحساسه مسيطر عليه وجودها، عدت ساعات كثير  
 من الليل في التردد هل بيعتلها؟ ولا لا! ولو بعت ليها هيقولها إيه؟

قرر أنه مش هيسنتي وهيدخل يقولها ليها صريحة ويا ترفض يا توافق،  
 وأي قرار هو هيحاول يستحمله... رغم انه مش قد كسر كمان.

مسك تليفونه ومن غير ما يشوف الوقت فتح الفيس بوك، قلبه دق بسرعة  
 لما شاف أنها منزلة قصة جديدة علي صفحتها الشخصية من كتابها الجديد،  
 أفكر أن دي فرصة كويسة يدخل يبارك ليها علي الكتاب ومن هنا هيبدا  
 الكلام بينهم....

عينيه شافت الساعة واتفاجئ أن الوقت مر بالسرعة دي والساعة أصبحت  
 5 الفجر، قال لنفسه هي أكيد نايمة دلوقتي فأكيد مش هيبعتلها، دخل الشات  
 الخاص بيها اللي لسه فاضي من يوم ماقبلت طلبه للصدقة من شهر وقلبه  
 دق بفرحة لما لقاها فاتحة نت ومش نايمة، ماترددش ثانية أنه بيعتلها  
 وبالفعل كتبها رسالة بحماس وبعثها، كان خايف أوي ماترددش عليه أو  
 تخرجه بأي رد...

لكن بسرعة كانت وصلت رسالة محمد لبسنت اللي كانت قاعدة بنتابع  
 التفاعل علي القصة، وأيه اراء الناس فيها؟ أول ما سمعت صوت وصول  
 رسالة وظهرت ليها صورته اللي بتقولها أن الرسالة وصلتها منه، قلبها دق  
 نفس النبضة الغريبة ولكن المرة دي بسرعة أكبر، مشاعر كثير حسنها في  
 خلال لحظات بسيطة، مفاجأة، بهجة، حماس، وشوية خوف بتوتر...

اعتدلت في جلستها من المفاجأة وهي بتقرأ رسالته بلهفة

-أزيك يا بسنت، يارب تكوني بخير ومامتك بخير، ألف مبروك علي كتابك الجديد ومن نجاح لنجاح بإذن الله.

وبإيد بترتعش كانت بتكتب الرد علي الرسالة

--احنا بخير الحمد لله، الله يبارك فيك يا مستر محمد متشكرة لزوقك.

ابتسم محمد من سرعة ردها، وقلبه فرح من إنها ماتجاهلتوش وبالفعل ردت، فكر يفتح معاها كلام في أي حاجة تاني لحد ما يشوف هيقدر يصارحها أزاي فكتبلها

- بس حلو جداً المشهد اللي نزلتيه من الكتاب ده حمسني أشتريه، بس عندي سؤال..

سألته بسرعة:

-سؤال إيه؟

كتبلها:

-أسم الكتاب معناه إيه؟ بيوصل فكرة إيه؟

ضحكت بسنت وسجلته تسجيل صوتي بنقوله:

-المفروض أنت تفهم مقصد الأسم من الرواية نفسها، لازم تستنتج معناه مع الوقت فأنا هسيبك أنت اللي تيجي في يوم وتوضلي معني الأسم إيه

قلبه دق بقوة مع صوت ضحكتها، بيحس نبرتها بتطبطب عليه مع كل كلمة بتقولها، كل احساس متعب شافه خلال اليوم محاه تسجيل صوتي مدته كام ثانية لمجرد بس أن صوتها اللي فيه، نفسياً ارتاح لما شاف أن هي بتعامله

عادي وفي أمل أن يقربوا من بعض أكثر، سند ظهره علي الكنبة بارتياح،  
وأندمج في الكلام معها من غير ما يحس بالوقت اللي بيمر وكل اللي  
حاسس بيه بهجة محسش بيها من سنين بعيدة أوي

في الجهة الثانية كانت بسنت اللي تناست الدنيا وركزت في كلامها معاه،  
هي رافضة فكرة أنها تتكلم مع الشخص ده لكن في حاجة جواها بتتكلم  
معاه، حاجة جواها حابة الوقت اللي بيمر وهي بتكلمه وبتسمع صوته لما  
يبعت ليها تسجيل صوتي، جواها ارتياح غريب من أول كلامهم رغم أنه  
أول مرة يكلمها ورغم خوفها اللي كان منه...

لسه برضه جواها قلق وفكرة متكونة في عقلها بتقولها الشخص ده جاي  
عشان يئذكي، بس الحاجة اللي جواها اللي حابة كلامها معاه بترفض  
الفكرة دي وبتقولها ده أول شخص تكلميه في الدنيا وتحسي بالارتياح!!

عدت ساعات كثير، مافاقوش من غفلتهم عن الوقت إلا لما زادت حدة  
الشمس تعلن لهم عن صباح جديد جه وهما لسه بيتكلموا، هي ضحكت  
جامد لما وقت الليل عدا من غير وحده وقسوة الذكريات والتفكير  
هو ضحك من كل قلبه لما داعب احساس البهجة قلبه وأضافه روح شباب  
جديدة كان مستني يحسها...

قفلوا الأثنين ولأول مرة من سنين...مبسوطين

هو مبسوط بأن حلم سنة كاملة في إشارة بتقوله أن ربنا سمع دعائه وهيبدأ  
يتحقق

وهي مش فاهمة هي مبسوطه ليه؟

\*\*\*

رن تليفون بسنت، عادة زي كل يوم في نفس الميعاد بتصحياها عشان ميعاد  
الشغل، ردت بحماس كأنها نائمة من وقت طويل جداً وصاحية فايقة  
ومرتاحة:

-صباح الخير يا ست البنات.

استغربت عادة وضحكت بحنين لصوت البهجة اللي افتقدته في نبرة بسنت  
وسألتها:

ده إيه الرضا ده كله؟ الحلوة شكلها رايق ومبسوطة خير يارب!

ربطت شعرها بسنت واستعدت انها تقوم من السرير وبابتسامة قالتها:

-ولا أي حاجة، عندي شعور بارتياح بس، صحيح أسكتي تخيلي مين بعثلي  
فيس!

سألتها عادة بتوتر:

-مين؟

-محمد...

--محمد سليم؟

-أه يابنتي، مستر محمد..

--لا دا انتي تلبسي بسرعة بقي وتيجي المدرسة قبل ما اطلع الحصة الأولي  
عشان أسمع منك بالتفصيل..وأنا صحيتك يابسنت أهو الايكي جاية متأخرة  
بقي.

ضحكت بسنت علي فضول عادة واتفقوا أنها هتلبس بسرعة وتروح بدري  
مش متأخر زي كل مرة، بالفعل قامت لبست ولأول مرة من سنين فانت  
تحتار تلبس إيه؟

استغربت بسنت من روح الطفولة الجديدة اللي دخلتها، اقبالها علي الحياة مرة واحدة هي مش فهماه لكن حباه، حابة تختار الوان هدومها متناسقة، وتسمع مزيكا عالية وهي بتلبس، وتظبط حجابها بالسنتي، وتلمع جزماتها وتبتسم لمظهرها النهائي في المراية قبل ماتاخذ شنطتها وتمشي...

\*\*\*

أول ما دخل محمد المدرسة عينيه وقعت عليها واقفة وسط الطلاب في الطابور ماصدقش نفسه، غمض عينيه وفتحها مرتين بيحاول يصدق أنها موجودة بالفعل وجت بدري، بصتله وابتسمت ابتسامة خفيفة فأبتسم جامد وهو لسه مش مصدق، مش عارف يستوعب جمالها النهاردة الزيادة، ولا وجودها اللي مش معتاد، ولا ابتسامتها ليه... هي ابتسمت بجد؟

بيسأل نفسه وهو رايح الطابور وعينيه متبعاها وقلبه بيحاول يشبع من وجودها، خايف يكون لسه نايم في البيت وده حلم، هي ابتسمت بجد؟

بيسأل نفسه وطالع حصته بحماس، سلم علي التلاميذ بابتسامة اول ما دخل المعمل وده أضاف ليهم روح للحصة، كل دقيقة والثانية يفكر ابتسامتها ليه فيزيد مرحة مع الطلاب ويزيد حبهم للحصة عن أي حصة تاني فانت، خلصت الحصة ولأول مرة التلاميذ يطلبوا منه يكمل شرح كمان! وقف قدامهم وبص لملامحهم المتحمسة باستغراب وابتسم وجواه فكرة واحدة بس...وجودها بيحلي كل حاجة سيئة وبيطلع الحلو المدفون جواه.

في غرفة المدرسين كانت عادة بتشرب النيسكافيه في الكوباية الخاصة بيها وبتسمع بسنت اللي قاعده بتفطر قدامها باهتمام، مركزة مع ملامحها ونظرتها وحركاتها وهي بتتكلم وتحكيها عن كلامها هي ومحمد وقلبها مش مطمئن، جواها حاجة بتقول أن احساسها اللي واصلها من محمد صح، وجواها حاجة تانية بتقولها أن دي مشكلة كبيرة جاية هي مش قدها....

بس ياسنتي وفضلنا نتكلم وماحسنناش بالوقت وببص في الساعة لقيتها 8  
الصبح

سكنت بسنت للحظة وسابت المعلقة من إيديها في عبة الكشري وسرحت بعينيها في الأرض ورجعت قالت لغادة:

-بس أنا خايفة يا غادة محمد يكون جاي عشان يرتبط بيا ويحطني وسط اللسته بتاعته في الارتباط...

انقبض قلب غادة وكان بسنت بتقرأ اللي جواها وقالقها، ساكتة غادة وخايفة ومش عارفة ترد عليها بإيه، لكن في النهاية قالتلها وهي بتحاول تكذب إحساسها:

-ماعتقدش أنه هيفكر يعمل كده معاكي، ولو عملها يا بسنت أنا مش هقبل تكوني تسلية لمحمد...المره دي لو حسيت أن الأذية ليكي أنا اللي هقف لمحمد..

+مياه يا جماعة بسرعة مياه..

اتفزع الأتئين علي صوت واحدة من المدرسات لما دخلت مزعورة وبتصرخ فيهم عايزة مياه، سمعوا دوشة بره الغرفة وفي قلق واضح، سألتها بسنت عن اللي بيحصل لكن المدرسة مش عارفة تشرح لهم في إيه من الخوف، رايحة جاية في الغرفة بتدور علي زجاجة مياه، مرة واحدة الدوشة قربت تجاه الباب، وكل ما بتقرب قلب بسنت بيتقبض وكأن شعورها بيقلها أن اللي جاي شيء هيوجعك مش هيخوفك...جسمها كله فقد السيطرة علي أعصابه وقعدت علي الكرسي مخضوضة ومصدومة وبتتنفض، وغادة واقفة بتصرخ من الدهشة والفرع لما دخل مجموعة من المدرسين شايلين محمد شبه فاقد للوعي ومش قادر يتنفس...



بعد ضحكة سخيفة وبصوت عالي مستفز قال فتحي وهو واقف جنب الكرسى اللي قاعد عليه محمد:

-بس بس أنتوا مالكم اتلميتوا وعملتوا حوار وقلقانين كده ليه؟ مش أول مرة يعني... هو كده مش هيسكت إلا لما يموت نفسه في مرة.

بصتله غادة بضيق وهي واقفة قدام محمد، وماسكة زجاجة المياه وقالت له:

-يعني إيه الكلام اللي بتقوله ده يا مستر فتحي؟

راح ناحية باب الغرفة وقبل ما يخرج منها قالها:

-- يعني البشمهندس من كتر ما بينسى يشرب مياه، وبيقعد أيام من غير ما يشرب وقرب يجيله جفاف، ومن فترة للتانية لازم يقع مننا كده لحد ما حد يلحقه بالمياه.. يعني هو أنتي مش عارفة محمد يا أستاذة غادة ولا إيه!

خرج فتحي من الغرفة وتابعته غادة بنظرتها المتضايق لحد ما اختفي عن أنظارهم، ورجعت بنظرتها لمحمد تظمن عليه، وفي وسط ما كل المدرسين بيوزعوا عليه السلامات والنصائح، ويمشوا واحد ورا التاني، كانت بسنت في زاوية من الغرفة قاعدة مكانها علي الكرسى وفي حالة تورتر وخوف بتتابع المشهد، قلبها كأنه في سباق مشاعر بتجري جواها وتتسابق في مين هيظهر في ردود أفعالها الأول؟ بتحاول تتجاهل أنها خافت عليه، بس دي حقيقة ملامح وشها، ورعشة جسمها مش قادرين يكذبوها...

قاعد محمد علي الكرسى حاطط أيده علي صدره بيحاول ياخذ نفسه ويسترجع طاقته بعد ما لحقوه بالمياه، وبسنت بصاله بعيون بتعافر عشان ماتبكيش، ومش عارفة المفروض تتصرف أزاى وتقوله إيه؟

بعد ما الكل سابوه وراحوا علي فصولهم، وغادة راحت علي حصتها وهو فضل عشان يرتاح، أتبقي في الغرفة معاه بسنت اللي لسه بصاله بزعر مابتتحركش، ومابتنطقش، ومش منتبهة أنها لوحدتها معاه في الغرفة وأنها الوحيدة اللي لسه ما طمنتش عليه ولا قالتله أي شيء من واجب الاهتمام، بس هو ماكنش مستني منها ولا كلمة لأن ملامحها قالت كل حاجة!

أبتسم لها بضعف وقالها بصوت هلكان:

-مالك يا بسنت مخضوضة كده ليه أنا ماموتش!!

انتبهت بسنت لكلامه، بصت حواليتها وأدركت الموقف، قامت وقفت بارتباك وبصت في ساعتها وبدأت تلم حاجاتها بعشوائية، وتكلم بسرعة وتوتر من الكسوف، وهو بيحاول يفهم منها عايزه تقول إيه:

-لا انا.. أصل الحصاة بدأت وأنا هطلع... ماخفتش أنا لا... ابقى اشرب بقي  
...

وقفت مرة واحده وهي شايلة حاجاتها في حضنها وأخذت نفس عميق وخرجته ببطء بتحاول تهدي، التفتت وبصتله وقالت وعينيها في الأرض قبل ما تخرج بسرعة من الغرفة:

-ألف سلامة عليك يا مستر محمد..

ضحك رغم تعب من جنانها وعفويتها وحط أيده تحت خده وهو مثبت عينيه في المكان اللي كانت واقفة فيه...

\*

عدي اليوم وماراحتش تفاصيله وأحاسيسه من جوا محمد، ساعات اليوم خلصت وبدأت ليلة يوم جديد لكن الميزة فيه أنه هيكون أجازة، ودي فرصة كويسة للسهر، ولخلق مجال للكلام من جديد مع بسنت، الساعة أصبحت 3 قبل الفجر مش عارف بيعت ويتكلم في إيه؟ مستني أي فكرة أو أي موضوع بس مافيش، لحد ما أكرر المشهد من جديد

بسنت نزلت قصة جديدة، دخل قرأها بلهفة وضغط ليها إعجاب كنوع من لفت النظر زي ما طول المدة اللي فاتت دي بيحاول يلفت نظرها بأنه مهتم باللي بتنزله، ولكن للأسف ماينتبهش، دخل الشات وبعثها:  
-شابوووه، كل يوم عن اللي قبله بيزيد حماسي أني أقرأ الرواية.

قلبا دق بلهفة، أول ما وصلتها رسالته، شعور غريب بالراحة بيوصلها مع أول رسالة بتوصلها منه...شعور بالطمأنينة والونس بيتضافوا ليومها في الوقت اللي بيظهر هو فيه، ابتسمت بفخر لما قرأت رسالته وكتبته:

-وطبعاً مكسل تشتريه زي ما بتكسل تشرب مياه!

ضحك جداً محمد وسجلها تسجيل صوتي يحكيها فيه عن معاناته وقت تعبته في المدرسة، وقد إيه الموقف ده أثار في نفسيته بالسلب وقلبله يومه خصوصاً أنه بيكره أنه يظهر قدام الناس ضعيف، بدأ محمد يحكي مع بسنت عن حياته، في إحساس راحة بتبثه ليه بوجودها بيجبره أنه يتكلم، أنه يحكي...أنه يفتح ليها باب تدخل منه لمناطق ضلمة جواه مايبحبش حد يبصلها حتي من بعيد...مستغرب محمد من اندفاعه الغريب معاها ومن سيطرتها عليه وعلي عقله اللي كان من المستحيل يكون ليه قائد أنثي يتحكم في تفكيره بالكامل..

ببمر الوقت وبتسمعه أكثر، وسماعها ليه فيه حنيه وصلاله ومطمناه، هي حابة تسمعه مش عندها فضول وده كان غريب بالنسبة ليها، هي بتتأثر وتنفعل مع كل كلمة، بتسرح بخيالها وتعيد المشاهد اللي بيحكيها في عقلها وبتزود فيها وجودها كأنها عاشت كل لحظة من اللي بيحكيها معاها،

الساعات في الكلام معاه أصبح مرورها سريع، لما بينتهي الوقت ويوصل للحد المطلوب لنهاية الكلام كانت حاجة جوا منها بتكون محتاجاه يستني...محتاجاه حتي لو مش هيتكلم مايمشيش...بس الواقع بيحتم عليهم يعيشوا حياتهم عادي وينتهي النقاش علي أمل تيجي فرصة ثانية، عشان كل يوم يتعاد نفس السيناريو بعد نص الليل...

أسبوعين مروا أحتل فيهم محمد جزء كبير من ساعات يوم بسنت، أصبح شيء أساسي تستني منه رسالة كل يوم ليل، وتصحي الصبح بدري تروح المدرسة تدور عليه بعينيها، لحد اليوم ده..أصبح في بينهم تعاملات في المدرسة، بيتشاركوا الفطار هما وغادة، بيحكوا في تفاصيل يومهم، بيعدوا علي بعض في حصصهم يضيفوا بهجة لبعض بمجرد نظرة وابتسامة..

اليوم اللي وقفت فيه بسنت في فناء المدرسة مبتسمة وسرحانة وهي متابعة محمد بلبسه الرياضي وهو يلعب ماتش كورة قدم مع فريق من الطلاب عندهم مسابقة...اليوم اللي فاقت مرة واحدة من الشرود وتحولت ملامح الارتياح والابتسامة اللي اختفت لعدم فهم وقلق وأسئلة جواها بتتردد:

\*هو الخوف اللي كنت بخافه من محمد راح فين؟ هو ده مين واللي أسمه محمد سليم اللي بكرهه مين؟...هو في إيه؟\*

\*

-أنسي إيه يا كريم دول 5 سنين..

قالها عبد الرحمن بصوت مخنوق وقام وقف قدام شباك غرفته يبص للسما بحزن، حتي السما مضلمة كلها غيوم، تراكم جواها ضغط الجو لحد ماهيجيلها وقت وتنفجر من البكا زي ما هو نفسه يفجر طاقة الكبت المغيم جوا قلبه، مشتاق لبسنت ومش قادر المرة دي يحاول ينساها.. هو عنده يقين أن المرة دي بسنت مش راجعة..هو شاف تغييرها الغريب عنه وقسوتها

آخر مرة رجعتله وزعلها وخلاها مشيت... المرة دي بسنت مش بتكابر،  
المرة دي حتي ماعندهاش الطاقة تفكر في المكابرة!

رغم تأكده من ده لسه مش فاهم هي ليه زعلت؟ أو هي ليه حسنت باللي  
حسنته ده وخلاها مشيت، رغم أن كان بينهم حاجات أكبر من كده تخليها  
تقسي وتمشي وما عملتش كده.. أشمعني المرة دي؟...

أفكر آخر مشكلة بينهم بتفاصيلها، وأزاي لما غارت عليه من استقباله  
لصاحبته وقت رجوعها من السفر و بكت بحرقة ليومين وسابها من غير ما  
يكلمها، حتي كنتقدير لوجودها وقتها، أفكر أزاي أتحوّل البكا والنهنية  
بضعف لنظرة قرف ونبرة قاسية وكلام يوجع، أفكر عدم سماعها لميرراته  
وعدم سماحها ليه أصلاً بالتبرير... أفكر ضحكة السخرية بثقة منها قبل ما  
تسيبه وتمشي وما ترجعش تاني..

كان قاعد كريم مراقبه ومستغرب تصرفاته ومستغرب شروده، عبدالرحمن  
أكثر شخص عاشره كريم وكان فاكر انه فاهمه وطلع شخص هو أتفاجئ  
منه، وحس أنه خلال السنين اللي فاتوا أتغير وكأنه واحد ما يعرفوش، كريم  
شاف وسمع من الأثنين، عاصر القصة بينهم من أولها لآخرها ولحد الآن  
مش قادر ما يحترش بينهم، أكثر علاقة شافها متناقضة في حياته،  
عبدالرحمن شخص بيحب وبيعشق بسنت وده شيء واضح من تصرفاته  
وكلامه عنها وقت غيابها، ولما بتكون معاه بيلاحظ أنشغال عبدالرحمن في  
حياته اللي المفروض بسنت جزء أساسي فيها بس هو ما يبجس هوش،  
بيستغرب لما بعد وقت بسيط من رجوعهم لبعض بسنت تمشي بسبب عدم  
حب عبدالرحمن واهتمامه بيها اللي لو سمعت عبد الرحمن وهو بيتكلم عنها  
قبل ما ترجعه هتقول أنه مش هيصيح ثانية ثانية بعيد عنها... الأكثر  
استغراب لكريم هو أن حتي لما بتمشي هو مش بيحاول يرجعها هو يفضل  
يستناها!!

بسنت أكثر شخص حب عبدالرحمن، بل هي الشخص الوحيد اللي شاف كل  
عيوبه وحبها وتقبلها وشافت منه كتير وتحملت، ورغم اللي بتشتكي منه  
وبتعاينه معاه كان كل مرة كريم يقول هي المرة دي أكيد مش هترجع

ببلاقيها بترجع...سؤال بيتردد جواه حاليا..هي ممكن بسنت فعلا المرة دي  
تاني ترجع؟

\*

بعد ما أخذت بسنت حمام دافي واستعدت للنوم عشان تستقبل يوم شغل  
جديد، وبعد ما جهزت طقم جميل بألوان متناسقة بين اللون الأبيض  
والأزرق الفاتح والحجاب اللي كله ورد بسيط ورقيق لونه أصفر كناري  
زي لون شنطتها، فردت جسمها علي السرير، فكت شعرها وفردته جنبها  
علي مخدتها، خدت نفس عميق وخرجته ببطء وغمضت عينيها...

فتحت عينيها مرة واحدة تاني وقامت بسرعة فتحت تليفونها لقت الساعة  
11 بليل لسه ففقلته تاني وابتسمت ابتسامة خفيفة وفضلت قاعدة مكانها  
شعرها حوالين كتافها ودراعاتها مفرودين قدامها، وعينيها مركزين في  
الفراغ، رجعت مسكت تليفونها تاني وفتحت شات معين فيه وبدأت تكتب

- النهارده 2017/9/10 الساعة دلوقتي 11 مساء، جوايا شعور بالراحة  
كنت بكلمك عنه من شهور وبقولك أن الشعور ده ناقصني، هو أنا مش  
عارفة مصدره إيه؟ بس المهم أني حساه...الفترة دي أنا مبسوطة وبهتم  
بنفسي أكثر، بس أنا زعلانة من نفسي جدا عشان بقيت مقصرة في  
الصلاة...بس أنا هرجع أنتظم تاني أنا وعدتك إنني مش هستسلم عشان ربنا  
يكرمنا ويجيبك ليا علي خير...أنت واحشني جدا علي فكرة وحياتي  
محتجالك بجد...صحيح، الرواية بتاعتي عاجبه ناس كتير أوي، كان نفسي  
تكون موجود دلوقتي عشان أشاركك فرحتي...بس أكيد أنت دلوقتي برضه  
بتعمل إنجاز عظيم..أنا عارفة أنك عظيم.

بعنت الرسالة وابتسمت بحنين وقلقت التليفون وحضنت مخدتها ونامت...

\*

أخذ محمد المبلغ اللي اتفق عليه مع العميل قبل التوصيلة وحطه في ظرف  
وقفله وحطه في جيب بنطلونه قبل ما يبص في ساعته ويلاقيها 7.30

الصباح، دور محرك العربية وأتحرك بسرعة في طريق بيته عشان يلحق  
يوصل ويجهز قبل ميعاد شغله الأساسي في المدرسة وجواه شعور بالزعل  
من أن قراره الجديد شغله عن الكلام مع بسنت، واللي هو زيادة شغله بدلا  
من شغل التدريس بس، أصبح تدريس طول اليوم ولبيل سواق أوبر عشان  
يجهز للخطوة اللي بيسعالها....

صحيت بسنت علي رنة غادة مفزوعة، أزاي الساعات عدت ومافيش  
رسالة وصلتها من محمد؟ فضلت تفتح نت وتقله يمكن هو بعت حاجة  
والنت اللي مش شغال! لكن مافيش..

قامت لبست هدومها وجواها حيرة، وقلق، عقلها يفكر هو ممكن محمد  
يكون جراه حاجة؟

في المدرسة فرحت أول ما شافته داخل من البوابة، بس بسرعة جدا  
أتحولت ملامحها لضيق بس المرة دي مش بقرف.. المرة دي بألم وخنقة!!

كان داخل وفي أيده سيجارته بيشرّب فيها بشراهرة، ملامحه دبلانه وباين  
من عينيه الحمرا الإرهاق والسهر، كل شيء كان عادي بالنسبالها، قلقها  
علي شخص تعرفه عادي، زعلها علي إرهاقه وفضولها تعرف له.. عادي،  
لكن وجعها وخوفها عليه وشعورها الملح بالبكا لما شافته بيدخن سيجارة ده  
اللي هي كانت فاهمة أنه ماكنش عادي... حاولت تتجاهل شعورها ده لكن  
مش قادرة قلبها ما يوجعهاش لما تفكر فكرة شربه للسجاير، جواها رغبة  
شديدة من إنها توقفه عن ده لكن شايفه أن بأي حق تعمل ده!

في نص اليوم أجمع بعض المدرسين في غرفتهم وكان منهم غادة وبسنت  
واتضاف ليهن محمد اللي أول ما دخل بسنت ارتبكت وابتسمت له، سلم  
عليهن وقعد جنب بسنت ومجرد ما قعد جنبها روحها كأنها طارت من  
جواها فغمضت عينيها للحظة، فتحت عينيها وبصتله وهي بتتنهد كأنها  
بتأكد أن اللي حسته ده حقيقي ومع الشخص اللي المفروض بتكرهه ده!

غادة جالها تليفون فقامت تتكلم بعيد عن دوشة المدرسين، بص محمد  
لبسنت وقالها:

- انشغلت عنك أمبارح انا معلش، نمتي أمتي؟

بصوت هادي متوتر وبخودها اللي احمرورا من الكسوف وعينيها اللي  
بنتفادي النظر ليه قالتله:

-نمت بدري ولما صحيت مالقتش منك رسالة استغربت..

بصلها بتركيز وعينه في عينيها وفضل ساكت وده كسفها اكثر، ومرة  
واحدة قرب من ودانها وسألها بصوت واطي ونبرة مرحة:

-عينيكي دي ولا عدسات لاصقة؟

اتكسفت جداً بسنت ونبرتها ارتعشت وهي بتبصله بصدمة وتقوله بجدية:

-لا وربنا دي عينيا، أنا عنيا بني..

ضحك جامد محمد وفهمت بسنت أنه ماكنش سؤال وأنها كانت مغاللة  
مرحة منه فقامت من جنبه بارتباك وخرجت بخطوات سريعة بحجة أن  
عندها حصة في الوقت ده...

كانت المرة الأولى اللي تبص بسنت فيها في المراية أول ماتروح بيتها  
وتركز في لون عينيها وتفاصيلها، هل عينيها لفتت انتباهه فعلاً فغازلها  
بالطريقة دي؟ ولا ده مجرد هزار بحكم أنه بدأ يتعود عليها في التعامل  
شوية؟ كانت مبسوفة ومكسوفة طول اليوم وشافت الاحساسين دول في  
ملاحها في المراية فارتبكت..



طول الليل بتتردد الجملة جواها فتبتسم، جه معاد كلامهم استنته بقلب  
بينبض بتعلق غريب مخوفها، لما بعثها وفي وسط كلامهم قالها أنه كان  
نايم وبيحلم، افكرت حاجة مهمة جداً وبسرعة قالت له:

-محمد أنا افكرت حاجة مهمة أوي حصلت يوم ما ماما كانت في  
المستشفى..

قلق محمد وقام قعد علي سريره وبص للشاشة بتركيز وسألها:  
-حاجة إيه؟

-- أنا حلمت بيك حلم غريب أوي...

سألها محمد باهتمام:

-إيه هو الحلم؟

كانت مترددة جداً تحكي الحلم ومش فاهماه، شاغل بالها جداً لكن مش عارفة تحكيه، حاول معاها محمد تحكيه وبعد إصرار منه بدأت تحكي...

بهدهوء وبصوت متوتر قالت:

-كنت في مكان كله حجارة وخشب متكسر ومسامير، وكان لازم نعيه أنا وأنت، والأول أنت عديت عادي وأنا لا! فضلت واقف مكانك بعد ما عديت مستنيني أعدي، وبتشجعي، وخايف عليا اتئذي وكل ما أخطي خطوة بقع بس ماتأنتش، وبعد ماوصلت وخلصنا اللي كنا رايعين نعمله، جينا نرجع أنا عديت عادي وأنت ماعرفتش زيي في الأول...

وقفت في الكلام وسرحت والتسجيل الصوتي مفتوح ولما انتبهت قفلته، وصله وسمعه بسرعة وهي بدأت تتوتر؛ خايفة يسألها علي الباقي لأنها مش عارفة تكمل الباقي...الحلم مافيش فيه شيء مخيف، أو محرج، لكن الشعور اللي جوا التفاصيل هي بالفعل حساه وبتجاهله، عارفة إن من صوتها هيبان شعورها فيه، أو يمكن خايفة تحكي فتصحي الأحساس اللي بتحاول تتجاهله وتدفعه...

بالفعل محمد سمعه وفهم أن لسه في تكلمه وسألها عنها، اترددت وحاولت تقوله أنها ناسيه، لكنه أصر عليها أنها تفنكر ولما ماعرفتش تنهرب منه بدأت تسجيل صوتي ثاني تكمل فيه..ولكن المرة دي الكلام مش خارج من ذاكرتها.الكلام خارج من قلبها اللي بينبض بخوف...

-وقتها انت كنت بتحاول تعدي وتجليي ومن أول خطوة كنت بتقع وتتخبط واتعورت..وأنا..

وأنا كنت خائفة عليك.. جداً.. وكنت عماله أشجعك عشان توصلني، وبعدين في الآخر لما قربت سندتك، ووصلتك للمكان الأمان وقعدت أهدي فيك، وأطمئك، وبعد ما هديت روحك اشتريت ليا عيش وخلص اللحم.

بعثت التسجيل الصوتي، وفضلت تتنفس بسرعة كأنها كانت بتجري، كان انها تقوله أنها في اللحم كانت خائفة عليه شيء ثقيل علي قلبها، كانت محرجة وفي نفس الوقت مش عايزه تواجه نفسها بأنها بالفعل كل مايجي في دماغها المشهد بتخاف عليه بجد.. مرة واحدة لفته بعث ليها بيقولها كانوا كام رغيف عيش؟

استغربت من السؤال وسألته عن سببه، لكنه كان مهتم جداً يعرف عدد الأرغفة، حاولت تتذكر وقالتله:

-هو كان رغيف واحد بس ليه؟

سجلها وهو بيضحك جامد وبيقولها بصوت مبتهج مليون أمل استغربته:

-أنتي عارفة تفسير اللحم إيه؟ أو عمرك سمعتي عن تفسير الخبز في اللحم؟

من غير نقاش دخلت علي جوجل وبحثت واتصدمت، وزاد ارتباكها وقلبها دق بسرعة شديدة، هل اللي شافته ده حقيقي؟ هل ده ممكن يكون معني اللحم فعلاً؟

دخلت الشات لقيته بيحكيها إن كان ليه زميلة في الكلية حلمت في يوم بلحم شبه كده والشيخ لما فسر سألها كانوا كام رغيف وكانوا وقتها 18 والبنت أتجوزت بالفعل بعد 18 شهر من اللحم...

\*\*\*

-يعني محمد هو العريس؟

بصت بسنت لغادة بكسوف وخضة من السؤال وقامت من علي الكرسي وأخذتها من أيديها برا غرفة المدرسين وقالتها بصوت واطي:

-إيه اللي بتقوليه ده! وبعدين وطي صوتك إحنا في المدرسة

بصت حواليتها تشوف لو حد سامعهم ولما أطمنت أن مافيش حد مركز معاهم، بصتلها وقالتها:

-بصي أنا ما اعرفش بس التفسير الكامل للحلم أنه هيقف جنبي في محنتي، وأنا هكذا وبعدين أنا هتجوز بعد يوم أو اسبوع، ياشهر ياسنه..أما مش عارفة بقي حوار أن محمد هو العريس دي صح ولا لا..

--يابنتي بما أنه هو اللي اشتري واداهولك يبقي هو..

-أو يمكن هو اللي هيجيب العريس!

+ومابقاش أنا العريس ليه يعني..

اتفزعوا الأثنين لما فاجئهم محمد اللي جه من وراهم وسمعهم من غير ما ياخذوا بالهم، بصوله برعب وكسوف وهو باصصلهم وبيضحك، وقف جنب بسنت بمرح وقال لغادة بهزار:

-خلاص يا بنتي هو قدر إحنا مش هنقدر نخالفه، جهزي أنتي بس السواريه واتمرني علي الزغاريد

أنكسفت بسنت وخدودها أحمرها وبصت لغادة اللي بتضحك من قلبها بجد وضحكت، كان قلبها بيدق كأنه في حفلة رقص موسيقتها عالية، بصت

بسنت لمحمد اللي واقف جنبها يهزر مع عادة، كانت عارفة أنه طويل بس أول مرة تحس فرق الطول بينهم، ابتسمت بخجل أكبر، وقفته جنبها، وفرق الطويل بينهم اللي حبه، وكلامه عنها، وضحكته...حسسوها بأنها لأول مرة أنثي، لأول مرة مش أم وصديقة، ومعلمة، وأبنة، وأب وأخ لنفسها..في حاجة مختلفة بتحسها مع محمد، في دنيا مختلفة في وجود محمد...أو يمكن محمد نفسه مختلف!

افتكر محمد حاجة وقال بسرعة:

-صحيح أنتوا رايعين الأحتفال بتاع بكره ده أكيد...هنروح مع بعض.

سألت بسنت:

-احتفال أيه ده؟

قالتها عادة:

-وأنتي في الحصاة المديرية جت عزمنا علي أحتفال أبنا معاذ عشان ختم حفظ القرآن وعاملين ليه أحتفال في حديقة أم كثوم وغدي وحوار كبير كده...أنا متحمسه للموضوع بصراحة.

فرح جداً محمد لما لقي أن عادة موافقة تروح، وده هيشجع بسنت أنها تروح معاهم، بص لبسنت ووجه كلامه للأثنين:

-يبقي جهزوا نفسكم أنتم الأثنين بعد المدرسة هاخذكم بالعربية معايا ومن غير نقاش ولا رفض وش كده احنا الثلاثة رايعين.

سابهم وراح المعمل وهو في قمة حماسه وسعادته وبيتمني الأمور تمشي زي ما هو مرتبها، أه متوتر وخايف من الخطوة الجاية بس لازم تحصل ومش قادر يستني أكثر من كده، راحت بسنت لحصتها الأخيرة وكلها مشاعر، مشاعر تايهة جواها مش عارفة فين مكانها الأساسي، دوشة أفكار بيتردد وسطهم جملة بصوت وضحكة أصبحوا مميزين عندها

\*خلاص يا بنتي هو قدر إحنا مش هنقدر نخالفه، جهزي انتي بس السواريه  
واتمرني علي الزغاريد\*

مرة واحدة وسط الشرح باب الفصل خبط، اذنت للشخص اللي بيخبط  
بالدخول، بصلها محمد من ورا الباب وملامحه جادة وقالها:

-بعد أزنك يا مس بسنت ممكن دقيقة برا عايز أقولك حاجة..

كل الأفكار أتكومت في فكرة واحدة هي خايفة منها، أعصابها سابت  
ورجلها بتترعش مش عارفة تتحرك خارجة من الفصل و كلها توتر، وقفت  
قدامه ورفعت وشها لفوق شوية عشان تعرف تبصله، بصلها بعينيه البني  
اللي رموشها طويلة وقالها:

-كنت عايز أسألك سؤال بس..

--سؤال إيه؟

ميل عليها عشان يقرب من ودانها شوية وقالها:

-عينكي دي ولا عدسات لاصقة؟

ضحك جامد بعد ما قال جملته وبالبشورة اللي في أيديها حدفته، حطت  
أيديها علي قلبها وهي بتأخذ نفس عميق وهو لسه باصصلها وبيضحك،  
ابتسمت بخجل وهي بتهدى وأخذت منه البشورة وهي بتقوله:

-هقتلك يا محمد..

وقف قدامها وبصلها جامد وقالها بابتسامة:

لو بعد سنه موافق

استغربت وسألته بعدم فهم:

-اشمعي سنه؟!-

أبتسم أكثر وغمز لها بطريقة درامية وهو يقولها:

-عشان الحلم يكون اتحقق..-

ضحك وسابها ومشى واقفة وشها أحمر من الكسوف، ومخبية عينيها بكفوف أيديها بطفولة وعفوية يبجبها، يمكن تفكره قصده علي حلمها هي اللي يتحقق، لكن هو قصده علي حلمه هو اللي مش هيسنتي أكثر عن أنه يحققه..

بعد دقائق كان وقت المدرسة أنتهي وفي خروج بسنت وغادة من المدرسة وقفهم ولي أمر وبدأ يتناقش مع غادة بحدة وقفت قدامه بسنت وبدأت ترد هي عليه بعصبية وصوتها علي، شافهم محمد من أول الموقف أتعصب وقل باب عربيته بقوة وراح لهم بيحاول يتكلم مع ولي الأمر اللي في مشكلة معاه هو وغادة لكن بسنت غضبانه من كلامه الشديد مع غادة فمش عارفة تتمالك أعصابها وتزعق معاه، محمد وصلها بعصبية وزعق فيها:

-اسكتي أنتي يابسنت مالكيش دعوة بالموضوع هو أنا مش واقف!

أخرجها وأذاها بصوته العالي من غير ما ياخذ باله، وقفت بسنت بعيد عنهم وخلص محمد نقاشه مع ولي الأمر وتوصل لحل معاه هو وغادة وسابهم يتناقشوا بهدوء والتفت لبسنت لقاها واقفة علي جنب باصة في الأرض ومكشرة، حاضنة شنطتها ووشها أحمر كأنها هتفجر في أي لحظة، راح ليها وقالها بنبرة حادة وهو لسه متعصب:

-أنتي بتتكلمي مع الراجل ليه؟ وبتعلي صوتك ليه وبعدين هو أنا مش واقف!

بنبرة بتعافر البكا وبصوت مهزوز وعينين مليانة دموع بصتلته وقالته:

-ماتز عقليش أنا مش بحب حد يز عقلي..

دموعها نزلت غصب عنها، زي الطفلة واقفة بتبكي ببراءة وبتحاول تداري وشها من الناس، قلبه دق بزعل، حس بالذنب وزعل من نفسه علشان زعلها، حس بأنه عايز يضمها لحضنه ويتأسفها عن اللي سببه ليها، فضل يعتذر منها علي أنفعاله ويبررلها بأنه ماحبش أن حد يئذيها بكلمة، قالته وهي بتمسح دموعها بعصبية بتدافع عن نفسها:

-أنا كمان ماحببش حد يئذي صاحبتني بكلمة وهو اذاها.

بنبرة حنينة وصلها وهو بيديها مندبل وقالها:

-حقك عليا ماتز عليش مني..

أنهدت بسنت وأبتسمت وكان شيئاً لم يكن، ضحكت جامد واستغرب، ماكنش يعرف هي بتضحك علي أيه بس هي كانت عارفة هي بتضحك علي أيه.. في ال25 سنة اللي فاتوا ماحدش عرف أزاوي يصلحها، كل الناس بيقلوا زعلها صعب ومش سهل تتراضى، كانوا بيقلبوا بهلوان لكن مابتراضاش، ماكنتش بتقدر تقولهم أن مجرد جملة بصوت حنين قادرة تمحي أي زعل وتطبطب علي قلبها.. ومحمد لوحده عرفها وقالها من أول مرة يزعلها، وكان أول واحد في الدنيا يعرف يطبطب علي قلبها

\*

في البيت وعلي صوت أصاله اللي شغال في سماعة بسنت، كانت مندمجة مع أحساسها الحلو اللي بيدق جواها، كانت فارده جسمها علي السرير، ومغمضة عينيها وسرحانة في كلمات الأغنية، وبتفتكر تفاصيل اليوم بإبتسامة



\*بقي طبيعي عليا اشوفك جي عليا اللي في بالي يا حبيبي أنساك، ماهو حقيقي الواحدة بتيجي وتنسي كلامها قصاد اللي راحتها معاه

كل ماشوفك أقول ماهو مش معقول، أنا قلبي ازاي بقي بيك مشغول وبسرعة كده؟ يعني اللي حبوا أوام مش أي كلام، عمري يا حبيبي ماشوفت غرام أنا شكله كده..\*

كل كلمة في الأغنية بتعبر عن اللي بيدور جواها، بتفتكر أزاي كانت قاسية مع كل الناس اللي حاولوا يوصلوا لقلبها خلال السننتين اللي فاتت وتستغرب، أزاي هو الوحيد اللي قدر يحول خوفها منه لراحة بالشكل ده؟ وأزاي جذبها ليه بالسرعة الغريبة دي؟.. أو أزاي قلبها دقله؟... هي فعلاً معجبة بمحمد؟ هي مش متأكدة من أحساسها وجايز ده يكون مجرد إحتياج..

فجأة صوت الأغنية سكت ورجع تاني، وبعدين سكت ورجع تاني! مسكت تليفونها وبصت فيه لقت رسايل بتوصلها من رقم محظور من تليفونها، دخلت الملف اللي فيه الرسايل المحظورة عشان تتفاجيء، كم كبير من الغضب اتملك منها مجرد ماشافت رقمه، رجع يفكرها بيه ليه؟ عايز منها إيه تاني؟ ليه كل مرة حياتها بتبدأ تبقى أحلي يظهر عشان يمحي الحلو اللي فيها ويمشي؟

وصلها أكثر من رسالة من عبد الرحمن أولهم

-انسى إيه يا كريم دول 5 سنين...جملة اتقالت بتكون اجابة لكل تفصييلة برجع أعيشها.. مش قادر أفهم أنتي أزاي عايشة جوايا بالطريقة دي..

في كل رسالة من الباقيين كلمها عن تفاصيلها وردود أفعالها اللي بيفتكرها في مواقف معينة بيعيشها في حياته، بسنت قرأت الرسايل وأتصلت بالآء بسرعة، ردت عليها آلاء بصوت بينام لقتها بتضحك جامد استغربت فسألته:

في إيه يا مجنونة بتضحكي علي إيه؟

مش قادرة بسنت تبطل ضحك وبيزيد استغراب آلاء اللي حاولت تسكتها  
عشان تفهم منها في إيه؟ بعد ضحكك طال لدقايق بدأت تاخذ نفسها وقرأتلها  
الرسايل وضحكوا الأثنين بصوت عالي، قالت آلاء:

-فكرتني الرسايل دي بمسدجات المرة اللي خانك فيها ولما عديتها له، سابك  
بعدها ومشى، ولما مل أنه يبقى لواحد رجع يستعطفك بيها.

قالت بسنت بصوت بيقاوم الضحك:

- والمرة يابت اللي سابني فيها عشان أختار حياته اللي تعجبه ومالقاش  
مكان ليا فيها عشان وجودي بيعطله عن حلمه، وسابني شهر بموت من  
الألم والزل ورجع بيعتلي شوية مسدجات شبه دول واعتذر فيهم، وقال إيه  
مش قادر أعيش من غيرك هو حد بيقدر يعيش من غير روحه...

ضحكت آلاء وقالتلها:

-يابنتي عمره ما هيتعدل أبداً والله، بيحب حبك ليه ومش قادر يستغني عن  
حبك ليه لكن مش عارف يحبك ومفكر أنه كده بيحبك أنتي.

--يحب مين يابنتي، ده واحد بيقولي أنا بحبك 50% بيخففوا لما بتبقي  
موجودة عشان ضامن وجودك، عشان كده بتشوفي أني مش مهتم  
بيكي...سيبك منه أصلاً صدعني عمال يرن عليا وعاملة للرقم بتاعه حطر  
وبرضه رناته مصدعاني..

-عادي كالعادة وقت فراغه هينتهي بعد دقايق وهيسكت مش هيرجع  
يفتكرك أصلاً..

قالت لها بسنت بحماس:

-سيبك منه المهم عايزة أحكيك عن حاجة محيراني..

-لا دا أنا أقوم أقعد بقي وأسمع بتركيز، حاجة إيه؟

ابتسمت بسنت وفتحت تليفونها وبصت علي صورة محمد وقالتلها:

-أنا حاسه مع محمد بأمان غريب أول مرة أحسه مع حد...أو من حد،  
وحابه وجوده في حياتي...بس أنا خايفة يجي في يوم ويطلب مني نرتبط،  
لأنني واخدة قرار أنني هقطع علاقتي بيه لو طلب ارتباط مني؛ عشان هو  
بكده هيكون ضمنى للسته وأنا مش بتاعة لعب...أنا قلبي مش حمل أصلاً  
أني أحب...هو أنا بحبه؟

من توتر وكلام بسنت اللي مش مترتب آلاء فهمت أن بسنت فعلاً جواها  
مشاعر تجاه محمد بس بتحاول ترفضها، سألتها:

-طيب أنتي دلوقتي عايزة إيه؟

قالتلها بسنت بحيرة:

-أنا لما تخيلت أن ممكن يجيلي عريس الفترة الجاية وكويس، والمفروض  
أقعد معاه لقتني مرة واحدة بفتح عنيا بخوف وبقول طب محمد...ركزت  
شوية كده أنا ليه عملت كده؟

سألتها آلاء بعدم فهم:

-أزاي مش فاهماكي؟

--يعني أنا لو جالي عريس وكان كويس فهتخطب، فمش هيبقي ليا علاقة  
تاني بمحمد حتي الزمالة، والكلام، والهزار، والسهر بليل علي الشات مع  
بعض هينتهوا...فأنا رافضة فكرة أن وجود محمد في حياتي يتمحي، أنا  
حابة أوي علاقتي بمحمد كصديق بس مش عايزه الموضوع ياخذ منه حيز  
ارتباط عشان ما اخسروش...

- وليه هتخسريه لو ارتبطوا؟

قالت بسنت بصوت مخنوق:

-عشان هو مجرد ما بيرتبط بيسيب..وعشان الحب والارتباط بيموتوا كل  
شيء حلو في العلاقة، مافيش حاجة أسمها حب بين طرفين، الحب ديمماً  
بيكون من طرف واحد والتاني بيتئذي، لحد ما العلاقة اللي بينهم تنتهي  
بكسر كل الحاجات الحلوة...أنا مش حمل ده تاني...ومش عايزة أخسر  
الأمان اللي حسيته بوجود محمد..أنا عايزة أفضل مطمئة.

\*\*\*

في اليوم اللي بعده، وبعد معاد المدرسة ما أنتهي وقف محمد قدام باب  
المدرسة بانتظار بسنت وغادة، متألق علي غير العادة بالقميص الكحلي،  
والبنطلون الجينز الجملي والكوتش الأسود والساعة الفضي اللي مابطلش  
يبص فيها من وقت ما وقف، طلع تليفونه واتصل بغادة يسألها ليه  
ماخرجوش لحد دلوقتي، فردت عليه بسنت مش غادة، صوتها بيترعش  
ومتضايق سألها محمد:

-خير في إيه؟

--غادة معدتها تعبتها وهي في الحمام دلوقتي وهتخرج تروح البيت، مش  
هنروح الحفلة...

اتضايق محمد جداً وقفل معاهما ودخلهم المدرسة، خرجت غادة من الحمام وأخذهم معاه يوصلوا غادة للبيت، بعد ما وصلوها وأطمنوا عليها كانت بسنت رافضة تتركب معاه العربية لوحدهم، محمد زعل جداً وملاحه اتغيرت وبان عليها الضيق، حاول يقنعها كثير أنهم يروحوا الحفلة لكنها رافضة ومخرجة تتركب معاه لوحدهم، لكن مع تبدل ملاحه للضيق والعصبية وافقت وركبت، فرح محمد جداً، أتحول لطفل في لحظة، كانت طول الطريق مش مركزة غير في حاجة واحدة، هي أزاى ماقدرتش تقاوم زعله وزعلت علي زعله؟

كان الاحتفال مبهج، أطفال كثير بناس كثير ومدرسين عارفينهم من المدرسة موجودين، أناشيد وفقرات تمثيلية لطيفة، وأجواء بسنت سعيدة بيها وأول مرة تعيشها، هي مبسوفة بس جواها احساس تجاه محمد مش مريح، في حاجة هتحصل هي حاسة بوجودها بس مش قادرة تحدد هي أيه؟ فجأة محمد ميل عليها وهما قاعدين علي الكراسي حوالين تراييزة المدرسين وقالها:

-تعالى معايا..

قام وقف وبصلها وهي بصاله وقلباها مقبوض ومتوتر، مترددة تقوم ولا تفضل، ولو قامت راحت معاه أيه اللي هيحصل؟

قامت ومشيت وراه زي الطفلة التايهة، مأماله بس خايفة من اللي جاي، مطماله بس خايفة علي مشاعرها منه! احساس متناقضة وأفكار كثير بتلعب في دماغها بتحاول تخمن هو مودياها فين وعاييز إيه؟

بعدوا شوية عن الزحمة والأصوات وقعدوا علي مقعد خشبي في ركن من الحديقة يببص علي النيل، طلب اتنين قهوة، طلع من جيبه شوكولاتة بالبندق وأدهالها بابتسامة، مدت أيديها وأخذتها بعدم فهم، سألته عن السبب قالها:

-عشان أنا زعلتك أمبارح و عيطتي بسببي، ممكن ماتعيطيش تاني عشان  
دموعك غالية..

أنصدمت وقلبها دق بقوة، مش علشان بس المفجأة، ولا علشان تقديره ليها  
ولزعلها، ولا علشان جملته اللي دخلت قلبها أول ما اتقالت.. لكن علشان  
الجملة أتقالت بكم حنيه غريب، لمعة عينيه وهدوء نبرته المرة دي مع  
الجملة كانوا خارجين كأنهم حزن حزن قلبها وطمئه، جه الجارسون  
أدالهم القهوة ومشى، بصلها وهي سرحانة في فجانها وبصوت متوتر  
قالها:

-بسنت أنا عايز أقولك حاجة...

قلبها كأنه وقف من الجملة ورجع يشتغل تاني بأقصى قوة عنده، إيديها ارتعشت بفنجان القهوة فحطته جنبها علي المقعد بهدوء، مركزة في الأرض، في المسافات الخضرا البعيدة، في الناس.. في أي حاجة إلا في عينيه، الدنيا سكتت من حواليتها ومش سامعة غير صوت أنفاسها، متوقعة اللي هي قوله بس ماكانتش متوقعة السرعة دي، في اللحظة دي كانت بتحاول تفكر... هل هتلق تشيع من وجوده قبل ما تخسره بعد ماترفض طلبه!

سألته بتوتر ولسه عينيهما في الأرض:

-حاجة إيه؟

بيحاول يهدي من التوتر اللي متملك منه، أول مرة يحس بكم الخوف ده، خايف يخسرها، خايف ترفض وتمشي، متردد بس مش قادر يستني يبوح ليها عن اللي جواه، نفسه تسمع نبضه اللي فيه كل الكلام وتوفر عليه الكلام اللي مش قادر يطلععه ومش عارف يقول إيه، كل الكلام اللي مرتبه طار من عقله ومافيش غير كلمة واحدة عايز يصرخ بيها ويترمي في حضنها ويعيط... \*ماتسيبينش\*

ساكت... وسكوته بيقتلها أكثر، بتسألها تاني حاجة إيه من غير ما تبصله لكن مش قادر يرد، بيشرب من فنجانه ومش قادر يحرك عينيه من عليها خايف تبصله في اللحظة اللي هي قوله فيها اللي جواه، سألته في محاولة منها أنها تطمنه أنها مش مخمنة اللي عايز يقوله:

-طيب في حاجة أنا عملتها تاني ضايقتك وأنت مش عارف تقولهالي ازاي؟

مرة واحدة قالها وصوته بيعافر عشان يطلع:

-بسنت أنا معجب بيكي وعايز أخطبك في أقرب وقت..

\*\*\*

دخل كريم غرفة نومه وقفل بابها بعصبية، مش قادر يسمع من مراته كلمة زيادة، مش قادر يشوفها قدامه، بيحبها بشكل مخيف ونفسه يفهم هي ليه مش بتحبه زي مايبحبها كده؟ بص لنفسه في المراية وشاف الغضب اللي مرسومة بيه ملامحه، بيدقق في شكله للمرة الترايون، هل لشكله، ولونه، وطوله عامل في اللي بيحصل ده؟! هل هي كان نفسها تتحب من حد أبيض عنه، وأطول منه، وبعضلات!! كل حاجة بيقدمهاها، إذا فين المشكلة؟ مافاضلش غير شكله..بس هي ديماً كانت بتقوله بحبك وبحب تفاصيلك...بيقي في إيه؟

حيران جداً ومخنوق، قعد علي السرير ويفكر، يفكر في قد إيه هي مهملاه، مش حاسه بوجوده، كل وقتها لشغلها وأصحابها، بيحس أنه أقل حاجة هي ممكن تفكر فيها وده بينديه، في كل مرة بيكون محتاجها تركيز في التفاصيل بيشف أنها مش مركزة معاه هو أصلاً، تعب من أنه يوضلها قد أيه بيحس أنه هامش في حياتها، أكثر شيء تاعبه أنه عاش من طفولته يسعي ويحارب علشان يكون أفضل حاجة علشان يليق بيها وأهلها يوافقوا بيه زوج ليها، وبعد ما بقي معها وبقت في بيته شافها حد ثاني غير اللي عاش يتمناها...هي بتقول أنها بتحبه، بس أفعالها كلها بتقول أنها مش بتحب غير شغلها...

فتح نت؛ حب يهرب من أفكاره ومن فكرة أن النهارده كان يوم مهم ليه في الشغل وأتصل بيها؛ يقولها قد أيه أنه مبسوط علشان اترقي في شغله، وأنها أول حد عايز يشاركه فرحته، وهي كل اللي ردت عليه بيه مبروك يا حبيبي معلش هقفل دلوقتي علشان داخله أشتري أدوات محتاجها للأورد الجديد...هو عارف اهتمامها الشديد بشغلها في الديكور، لكن فين اهتمامها بفرحته اللي كسرتها في لحظات!!

وقع قصاد عينيه بوست لعبد الرحمن صاحبه بيتكلم فيه عن تجربته الجديدة في مكان جديد خرج فيه مع اصحابه، دخل يشوف مين هما أصحابه اللي



معاه في الصور اللي علي البوست لقاهم بنتين، زاد حيرته شخصية عبدالرحمن هو كمان، بي فكره ديماً بمراته سهيله، بيفضل يقول أنه بيحب بسنت وبيعشقها ومش قادر يعيش من غيرها، ومن جهة ثانية هو مش بيعيش غير عشان يسافر ويخرج مع دي ودي ودول، بتكون معاه وهو مع ناس ثانية، أفكر مرة لما عبد الرحمن كان بيكي ليه ويقوله يخليها ترجعه هو محتاجها وراح كريم كلم بسنت في التليفون وسمع منها، أتشتكتله لما فاض بيها وفضلت تبكي، وقالتله أن أبسط مواقف المفروض يكون فيها وجود ليه مايبقاش موجود، زي أنها مثلاً وقت تعبها تحتاجه ماتلاقيهوش ولو 10 دقائق وبيقولها أن الـ 10 دقائق دول مستقبلة أولي بيهم!! ماكنش مصدقها لحد ما شاف بعينيه، شاف قد أيه ممكن حد يلجأ لعبد الرحمن قدامه وعبد الرحمن يهتم بأنه يعمل حاجة لنفسه في الوقت ده أفضل من أنه يلبي واجبه!!

زيه زي سهيله بالظبط، اللي كان ممكن تستني 10 دقائق بس برا المكان اللي هتشتري منه الأدوات تشاركه فرحته وتبينله فرحتها بيه....

قفل نت وقفل التليفون وهو حاسس بالقرف، نفسه يروح لبسنت ويقولها عندك حق، أنتي كنتي صح... التفاصيل بتفرق، الحب يعني أنك تشاركني واثاركك، أنك تحس بيا وأحس بيك... أنك تلاقيني معاك وماحسش في وجودك بنقص... قفل تليفونه تماماً وحط المخدة علي دماغه يحاول يكتم صوت أفكاره وينام...

\*\*\*

-أكمل كلامي ولا تحبي تقولي حاجة الأول؟

من غير ما بسنت تبصله وهي ساندة بكفوفها الأثنين جنبها علي المقعد، وباصة علي جزمتهما بتلهي نفسها علشان ماتقومش تجري من كتر الكسوف والمفاجأة اللي هي فيهم، هي مش متفاجأة... هي مش قادرة تستوعب أنها سمعته صح، هو خالف توقعاتها بالكامل، فاجئها بفكرة أنه ماطلبش ارتباط،

ده طالب منها ارتباط رسمي! محمد بيتكلم جد رغم أن اللي وصلها عن مسيرته أنه عمره ما أتكلم جد... بصوت مش مسموع قالتله:

-كمل..

هدوءها مخوفه، عدم وجود رد فعل منها مش مشجعه يكمل لكنه أخذ عهد علي نفسه يكمل اللي بدأه مهما كانت النتيجة، أتهد جامد وهمس قبل ما يبدأ يحكي \*يارب\*

-أنا مش معجب بيكي من اليومين اللي تعاملنا فيهم، الموضوع باديء معايا من زمان أوي..

ماقدرتش بسنت من صدمة الجملة ماتبصلوش، عينيها جت في عينيه وهي مبرقة ووشها أحمر للحظة، وشافت ملامحه الحزينة والمرتبكة، رجعت تبص في الارض تاني وسألته:

-أزاي مش فاهمة؟

-زمان من سنه أنتي كنتي بتيجي لغادة المدرسة، من أول يوم شوفتك فيه وأنتي شداني، كنت بستني الوقت اللي بتيجي فيه وأشوفك صدفة، الفترة دي كانت الدنيا سوده في وشي، كل حاجة مخبطة وملغبطة، كانت مجرد رويتك لدقايق من بعيد بتنشلي من الدنيا دي تطيرني في السما وترجعني تاني، في الفترة دي أنا كنت نفسياً متدمر، كنت بحاول أنسي همومي فكنت برتبط كتير وبرضه ما رتاحتش مع ولا واحدة، أنا ماكنتش بتسلي بحد زي مايقولوا... أنا عندي أخت يا بسنت وكنت بحطها قدام عينيها قبل ما أعمل أي حاجة... أنا كنت بتقي ربنا في أي حد معايا، بس أنا كنت بدور علي حاجة مش عارفها ومازلت مش عارفها ومش لاقياها....

-ومين قال أنها ممكن تكون معايا؟

بصلها جامد وبنقة هو مش عارف مصدرها إيه قالها:

-أنا حاسسها، أنا لاقيتها معاكي...أنا مارتاحتش مع حد زي ما ارتحت  
معاكي في الكام يوم دول يا بسنت....

ها يا بسنت ردك أيه؟

بصتلته وهي في حيرة ومش فاهمة هي مطلوب منها تجاوب بإيه؟...هل هي  
ممکن تشوف محمد زوج ليها؟ هل هو ده الشخص اللي هي مستنياه!!  
بتحاول تستوعب الفكرة وتحدد احساسها إيه مش قادرة، هي لسه في صدمة  
من كلامه، ماكانتش متوقعة أن محمد يختارها تبقي معاه باقي حياته ومش  
متأكدة هل هو فعلاً بيعني اللي قاله؟ سألته:

-ردي علي أيه؟ هو المفروض أرد بإيه؟

بدأ التوتر يعصب محمد فقالها بحد:

-هو أيه اللي ردك علي إيه؟ ردك علي كلامي يا بسنت، أنتي شايفة أننا قد  
الفرصة دي! يعني موافقة تكوني معايا ونكمل حياتنا سوا؟

أنا محتاج منك رد عشان علي حسب ردك هيكون لينا قاعدة تانية نقرر فيها  
حياتنا هتمشي أزاى؟ ونشوف كل واحد فينا محتاج أيه من الثاني، وأيه اللي  
ينفع واللي ماينفعش...فها ردك أيه؟

كلامه بيزيدها حيرة وخوف، هي في صراع بين أنها تقول أه موافقة، وأنها  
تقول لأ أو أنها تقوم تجري وتسييه، مسكت فنجانها اللي برد وشربته مرة  
واحدة وحطته مكانه وبصتلته وقالتله:

- طيب أنا في حاجتين ممكن يخلوني ما وافقش..

قلبه أتقبض وحس أن كل حاجة بتضيع منه في لحظة، وسألها بخضة:

-حاجتين أيه؟

بضيق قائلته:

-أولاً السجاير، ثانياً الشغل...

جملة كفيلة تقتل أي أمل جواه، كفيلة تقوله نيابة عنها أنا مش موافقة، بدأت نار تشتعل جوا قلبه وغضبه يظهر، بدأ محمد السيء يعافر عشان يخرجلها من جواه.. لكن حاجة تانية بتقاومه، حاجة عايزه تسمعها و مصدقة الأمل اللي جواه...بتكثيرة سألتها:

- يعني أيه الكلام اللي بتقوليه ده؟ أنتي عارفة وكل الناس عارفة أنني رافض فكرة أن مراتي تشتغل وعارفة برضه أن الحوار ده مافيش فيه نقاش وأظن أنك سمعتي ده كتير برضه، والسجاير مستحيل أبطلها وأيه أصلاً اللي يخليكي ترفضيني عشان سجاير؟

توقعت غضبه زي ما متوقعة أن كلامها اللي هتقوله هو مش هيفهمه، أو مش هيحسه زي ما هي حساه...وفي نفس الوقت هي مش عارفة ترتب جملتين علي بعض، كل الكلام جواها متكركب، هي عمرها ما شافت محمد زوج للسببين دول، وأهم الشغل...بسنت بتحب شغلها جداً وعافرت كتير فيه وعشانه، رفض محمد القطعي بيدل علي أنه شخص رجعي، شخص مش مؤمن بقدرات الأنثي ومش مقدرها، عايز يكتبها ويسخرها لخدمته هو وأبناءه وهي أكثر شخص في الدنيا مستحيل يقبل بده...بس هي عايزاه، هو دلوقتي حطها في طريق واحد ياتختار تمشي فيه عشان تفضل في حياته يا ترفضه وبكده كل واحد منهم يمشي...

غمضت عينيها وفتحتها بهدوء عشان تتلاقي عينيهم، وبدأت تتكلم بآلم حقيقي جوا قلبها:

-محمد...أنا لما بحب بحب بغباء، بتعلق بصورة صعب تتمحي، لما تسيبني هتكسر..

بسرعة رد:

-بس أنا مش هسيبك

بدموع رافضة تنزل من عينيها قالت:

-بس هي هتخليك تسييني...السجاير اللي بتشربها دي هتجبرك تتخلي عني، أنت دلوقتي جاي تطلب مني أكمل معاك حياتك وأنت بتنهيها أصلاً، كل سيجارة بتشربها بتبعدهك عني خطوة، محمد أحنا كنا مجرد زملاء وقلبي كان بيوجعني مع كل نفس بتتنفسه من السجاير قدامي، أنا لو أختارتك زوج أنت فاهم هحك قد ايه؟ فاهم أن علي قدر حبي ليك ده أنا هتوجع مع كل نفس منها أنت هتاخده؟

مش هقدر أوافق عليك وأنت بتتخلي عني وعن اولادي من قبل ما ناخذ أي خطوة جد..

قلبه وجعه من كلامها، كل كلمة قالتها كانت زي كرباج يقطع في قلبه، كهربة مسكت في كل جسمه، حاسس بالبرد والسخونة في نفس اللحظة، حاسس بالخذلان والذنب من نفسه قدامها، مش عارف هيبان ليها قد ايه كلامها زعله من نفسه، وكأنه قلم قوي يفوقه ولا سكوته وتكشيرته هي هتفسرهم لحاجة تانية؟

بصاله ومش قادر يرفع عينيه في عينيها، خرج منه صوت ضعيف مهزوم وقالها:

-أنا حاولت كتير بس ماعرفتش، بس أنا متأكد أنك هتساعديني أخرج منها، أنا عايزك جنبني عشان أنتي هتعرفي تصلحيني...أنا معاكي وعشانك ممكن أبطلها.

بحدة قالتله:

-لا يا محمد..مش عشاني، ماينفعلش يكون عشاني، لازم يكون عشانك، لازم تكون عايزني أبقى جنبك للأخر مش عشان أنا بس اللي عايزاك...

زي السهم كلامها ضرب قلبه، كلامها بيوجع، كلامها بيئذيه بس بيفوقه...هي أزاى في حنيتها قاسية كده؟ أزاى قادرة تسيطر علي قوته وتخلي مشاعره تطاوع مشاعرها وتألّمه علي ألمها؟

بصوته اللي قرب يختفي ونبرته المخنوقة هرب من نظرتها وقالها:  
-حاضر ربنا يسهل..

--هتبتلها؟

-هحاول...أكيد مش هنجح من أول مرة بس هحاول والله.

--بالنسبة للشغل لازم يكون في حل وسط، لازم نتصرف، لو محتاجني معاك إذا لازم نشوف حل في الموضوع ده يراضيك ويراضيني لكن لأ دي مش هعرف.

رجع لغضبه، السيرة دي بتعصبه، بتحوّله لكائن لا يطاق، هو مش قادر يفهمها السبب الرئيسي لرفضه، مش قادر يفهمها أنه قد إيه شاف في حياته زل من الشغل، قد أيه صاحبه عاني في حياته بسبب شغل والدته...قالها:

-بسنت، أنتي ردك أيه؟ أنا عايز أفهم دلوقتي، أنتي عايزاني زي ما أنا عايزك ولا أنتي بتحاولي ترفضني بشياكة؟

انعصبت بسنت وقلبها بيدق بحيرة، من جواها بتدعي ربنا ينجدها، جواها صراخ بيقوله أنا مش عارفة أنا عايزة أيه، أنا خايفة منك، ومن الحب، ومن الدنيا والعلاقات، نفسها حد يجي يشيلها من قدامه ويروحها البيت تعيط في سريرها بعيد عن عينيه اللي محاوطاها ومستتية منها إجابة هي مش

عارفاها، فضلت تقوله مش عارفة وده كان بيعصبه أكثر، وعصبيته بتخوفها أكثر.. في النهاية محمد قالها:

-أنا هسيبك وقت تفكري، أنتي طلبتي تصلي صلاة أستخارة، قدامك 3 أيام وأعرف ردك... وسواء وافقتي أو لأ يا بسنت، أحنا هنفضل أصحاب زي ما أحنا.

\*\*\*

يوم بطيء ساعاته بتعدي بنقل، من أول دقيقة أختفت فيها بسنت عن عينيه وركبت الميكروباص اللي هيوصلها لمنطققتها دموعها ماسابنتهاش، كل حاجة من حواليتها ساكنة وجواها حرب بتولع في أي شيء يقابلها جوا بسنت، روحت بيتها وبضعف غيرت هدومها ونامت علي سريرها وسط ضلمة غرفتها، تقل الهم علي قلبها وماعادتش قادرة تتحملة مسكت تليفونها وأتصلت بغادة، أول ما سمعت بكاءها قلبها أتقبض وخرجت من المطبخ بعد ما قفلت النار علي الأكل اللي كانت بتعمله، ودخلت غرفتها قعدت علي السرير وبخوف سألت بسنت عن اللي فيها، بسنت مش بترد، بتبكي بحرقة وبتتأوي بضعف، كل قوة وصبر السنين اللي فاتت أتكسروا النهارده، ساعتين علي سماعة التليفون غادة سامعة بكا بسنت وعاجزة عن أنها تهديها أو تفهم منها أيه فيها؟ قلبها مرعوب عليها وموجوع من صوت بكاها اللي بيعلي من وقت للتاني وأتحول لصريخ... كل ما بتهدى شوية تنكلم كلام مش مفهوم، وده بيرعب غادة أكثر، كل اللي بتفهمه جمل مش راكبة مع بعض

-أنا خايفة...

مش عارفة أعمل أيه... يارب أنا مش فاهمة حاجة... هو أيه اللي المفروض يحصل؟! أنا مش عايزة أتكسر، أنا هتكسر... أنا مش عايزاه يمشي... أنا مش عايزة اللي أنا حاساه أنا عايزة أهرب،... يارب ساعدني، يارب أنا خايفة

بسنت نفسها تبوح لغادة عن اللي حصل، نفسها حد يشاركها أفكارها ووجعها، نفسها تظمن أن كل شيء هيبقي بخير، بس هي مدركة أن مافيش حد هيقدر يعمل ده، بسنت عايزة محمد بس خايفة للمجهول اللي هتشوفه معاه، خايفة تنكسر تاني والمرة دي لو حبت بجد وحصل أي شيء هتنتهي بسنت للأبد، خايفة تغامر بنفسها وبقلبها في علاقة جديدة رغم أنها محتاجة محمد أكثر من أحتياجه ليها... مش عارفة تقول لغادة عن اللي محمد قاله، وخايفة من رد فعلها وكلامها اللي أكيد هياثر علي قرارها لذلك مش عارفة تشاركها غير بكاها... كان ليل كئيب مليان حيرة ووجع قلب، وخنقة، ورعب علي بسنت وغادة اللي مش فاهمة حاجة... زي ما برضه ماعداش بسلام مع محمد، علبتين سجاير مش مكفينه ومش قادرين يهدوه، مش مطمئن وحاسس أن اللحم الأخير ليه هو كمان هيتدمر... هو واثق تماماً أنه كداب، هو مش هيقدر لو ماوقفقتش يشوفها صديقة، مش هيقدر يفضل في حياتها بعد رفضها ليه... بس هو مش هيقدر يستغني عن وجود بسنت، حياته هتزيد سوء، هو وحياته وأمله الأخير هيتدمروا...

ليل مازار هوش النوم وهرب منه الأمان، وتاهت منه الراحة، عدي ببطء وحزن كبير، اليوم الجديد جه بسكوت، كل طرف منهم عينيه بس اللي بتتكلم وكل حاجة تانية فيهم بنتجاهل وجودهم قدام بعض، لكن القدر قادر يكون ليه رأي تاني...

لو سمحتشي يا ميس غاده أحمت أخويا تشاعبني أوي خالص في المذاكره، ممكن تقولي لي حل؟

لفت انتباه بسنت الصوت الأنثوي اللي بيصطنع الأنوثة بشكل خاطيء في طريقة الكلام فبصت، شافت بنت في أوائل العشرينات واقفة بدلع قدام المكتب اللي قاعدين عليه هما الثلاثة في غرفة المدرسين، لبسها محدد معالم جسمها وألوانه زاهية، خارجة جزء من شعرها من مقدمة حجابها، محددة ملامحها بشكل محترف بالميكب، وقفت غادة وسلمت عليها وبدأت تتناقش معاه، سابت بسنت كشاكيل الأولاد من أيديها وبصت لمحمد بغضب واللي كان قاصد يركز مع البنت ويبتسم علشان يشوف رد فعل بسنت، مسكت دفتر التحضير وخطبت بيه علي ذراعه بعنف وقالتله بحد:



قوم أفتحي المعمل عايزة البروجكت في حاجة.

بابتسامة خبيثه وصلها وقالها ببرود:

-روحي المعمل مفتوح

علي صوت بسنت وخبطته بالكشكول في دراعه بعنف وهي بتقوم تقف وتقوله بغضب وأصرار:

-قوم وديني المعمل بقولك، مش هعرف اشغل البروجيكت...بقولك قوم.

قام محمد وهو يبحاول يمنع نفسه من الضحك، عيون المدرسين عليهم بفضول واندهاش، عادة واقفة مصدومة من رد فعل بسنت اللي أخذت محمد وخرجوا من الغرفة، في الطريقة اللي بتودي للمعمل تنحت بسنت لما فاقت وركزت أنها خربت كل حاجة، حست بخجل شديد وهي ماشية جنب محمد اللي ماقدرش يمسك نفسه من الضحك أكثر وأول مادخل المعمل سألها:

-مالك ياباشا عنيف ليه النهارده؟

بصتله بغیظ وابتسمت بعدها بلحظات لما ايقنت انها بتغير علي محمد، بصت في الأرض، قرب منها خطوة وراسها قدام قلبه والفارق بينهم خطوات بسيطة، وهمس:

-غيرتك حلوة..

بصتله بكسوف وجسمها بينتفض من التوتر ووسط انفاسها السريعة قالتله وراسها مرفوعة لفوق عشان عينينها تحضن عينيه:

-أنا صليت الأستخارة وارتحت...

-بس أنا كنت متأكدة من ده..كنت متأكدة أن محمد جواه مشاعر ليكي وده كان شيء واضلحي جداً..لكن فعلاً مصدومة من حاجتين..

قالت عادة جملتها وهي في حالة بين الفرحة والصدمة وشعور كبير بالخوف، كانت بسنت بتسمعها بعد ما حكيت ليها وجواها نفس الخوف اللي واصلها من صوت عادة في التليفون، قامت من علي سريرها وقعدت علي كرسي مكتبها وبدأت تفتح الكمبيوتر وهي بتسأل عادة:

-حاجتين إيه؟

قالت عادة وكلها دهشة:

-أن محمد داخلها جد المرة دي، وده شيء غريب بالنسبالي منه ومش قادرة أتوقعه فعلاً...رغم أنني فرحانه بده أوي بس مستغربة، أزاى محمد نواها أخيراً؟

ضحكت بسنت ضحكة خفيفة وهي بتفتح صفحتها علي الفيس وردت عليها علي سماعه التليفون:

-ده برضه اللي صدمني، مفرحني جداً بس فعلاً ربكني، مش قادرة أخذ قرار لحد دلوقتي.

--أزاى مش قادرة تاخدي قرار، مش أنتي قتليله أنك ارتاحتني!

قالتها بسنت بثقة:

-بس ماقلتش أنني وافقت لسه هرد عليه يوم الاثنين بعد بكره..

ضحكت عادة وقالتلها:

-وأنتي مفكرة أنه مستني الرد؟..محمد كده أخذ منك الرد يا فالحة.

ضحكت بسنت هي كمان وقالتلها بإنكار:

-لا يا بنتي أكيد لا، المهم إيه الحاجة الثانية اللي صدماك؟

أنتهدت عادة وقالتلها بخوف:

-أنتي...أنا كنت متوقعة فعلاً أن محمد معجب بيكي، بس متوقعتش يكون في مشاعر ليه جواكي..عمرى ما كنت أتوقعها ولو حد غيرك اللي كان قالي كده عمرى ما كنت هصدقه.

أنتهدت بسنت جامد وابتسمت وقالتلها بصوتها الهالك:

-أنا نفسي مش مصدقه، ومش قادرة أفهم اللي أنا فيه ده إيه؟..أه مش هنكر في مشاعر، بس جت أمتي؟ و أزاى؟ مش عارفة...بس أنا ماقدرتش ماحسش معاه بالأمان، ماقدرتش أنى ما أغرش عليه، وماقدرتش ماحبش طريقته في الكلام، ونظراته، وكلامه، وضحكته، وتفصيله.. زي ما ماقدرتش ماأتوجعش لما أشوفه بيشررب سجاير..

أنفزع بسنت مرة واحدة، وصرخت بمفاجأة وهي بتضحك بكسوف، اتخضت عادة اللي قاعدة مش فاهمة في إيه وسألته بقلق، في إيه؟..وجاوبتها:

-محمد منزل بوسن بتاريخ النهاردة، وحاطط جنبه قلب، وبيقول فيه وأخيراً هبدأ أعيش...تفتكري هو كده أخدها أنى وافقت؟

ضحكت غادة علي رد فعل محمد، مرة واحدة تليفون بسنت رن برقم غريب ففقلت المكالمة مع غادة وردت تشوف مين، جالها صوته وهو خارج بابتسامة هي متخيلاها وهو بيقولها:

-سجليني محاميو وحطي جنب الاسم قلب أحمر و أفضلي حبي فيا حالاً.

أنفاسها بتعلي، وقلبها بيرقص جواها، بتضحك من قلبها بكسوف وبتحط أيديها علي عينيها رغم أنه مش شايفها بس قلبها مكسوف كأنه موجود بالضبط، بصوت رقيق قالتله:

-بس أنا لسه ماقلتش أني موافقة!

كل حاجة فيه بتفرح مع ضحكتها، قلبه بيعزف علي طبول الحب الحقيقي اللي أول مرة يدق جواه، مش مصدق، حاسس أنه بيحلم، ضحك وبهدوئه ونبرته اللي عشقتها وبتطمئنها قالها:

-مش أنتي ارتاحتي؟ بيبقي موافقة.. أنا خلاص اعتبرتك مراتي مافيش نقاش، ها هتحي فيا أمتي بقي؟

الحياة بدأت تبقي سعيدة وليها معني جديد، معني سعيد بس كله خوف وحيرة، وارتباك، وقلّة ثقة، قلّة ثقة في الظروف، وفي الحب والارتباط، قلّة ثقة في الدنيا واللي ممكن تحطه في طريقهم... وقلّة ثقة في مشاعر بعض من كتر اللي عانوه في حياتهم اللي فاتت وده كان شيء صعب يتحس بدون ألم، عاشوا يومين مع بعض كأني اتنين مرتبطين بيتعرفوا علي بعض جديد، كلام في التليفون لحد الصبح، مشاعر بتتكلم، وعقل بيعذب بالتفكير، فرحانين بأن قلوبهم بتدق وعادت ليها الروح، بيسمعوا عن بعض من بعض أكثر، بيناموا مبتسمين ويصحوا حماسيين علشان يجي اليوم المنتظر اللي هيتم الاتفاق فيه علي كل حاجة، أتقابل محمد مع بسنت بعد المدرسة في

حديقة عامة قريبة منها، ماشيين جنب بعض كل واحد بيرتب كلامه جوا عقله، كانت منافسة وحرب بين عقليين صامتين طول الطريق كل واحد فيهم من جواه بيجهز للمعركة اللي لازم يخرج منها منتصر بعقله...لحد ما قعدوا وعينهم جت في عين بعض، كل الكلام طار، كل القوانين اللي كانوا هيخطوها لبعض أتحولت لنبضة جواهم بتقول، مهما عملت أنا محتاجك خليك.

أتكلمت بسنت وطلبت منه تعرف هو إيه اللي عايزه منها في العلاقة دي؟  
إيه اللي عنده وإيه شروطه؟

محمد حقيقي عنده كلام كتير كان مجهزه بس مجرد ما وصلها، هو مش عايز غير أنه يفضل باصص ليها طول حياته ولو عاوزه هي تحطله شروط هو جاهز...

حاول يسيطر علي مشاعره ويحكم عقله، رسم علي ملامحه الجديدة وبدأ يتكلم:

- من حقك عليا أعرفك ظروف في الأول، أنا شخص كان مكون نفسه بمجهوده من صغره، كنت بشتغل كل حاجة وأي حاجة عشان أعتمد علي نفسي، الدنيا داست عليا كتير بس بكل دوسه علمتني خبرة جديدة...كل قرش حوشته لحد ما كونت مبلغ حلو...لحد ما أختي جت تتجوز واحتاجنا لجهازها مبلغ كبير وطبعاً ماكنش قدامي غير أنني أساعد بالمبلغ اللي معايا لحد ما ربنا كرم واتجوزت..

حالياً لسه بيداً من جديد بقالي شهر، طبعاً لو جيت لأعمامك ووالدتك الفترة دي وأنا فلوسي مش جاهزة مستحيل يقبلوا بيا، لذلك أنا هطلب منك تصبري عليا كام شهر وأنا هعمل كل اللي هقدر عليه، وبشتغل حالياً شغلانتين عشانك...وبإذن الله في وقت قصير أقدر أنجز....بس أنا هكون محتاجك، محتاجك تشجعيني وتقويني، أنا هطحن نفسي عشانك..بس تتحمليني.

طول ما هو بيحكى وهي بصاله براحة وابتسامة، وسرحانة في ملامحه وأسلوب كلامه، سكت مستني ردها فابتسمت أزيد، ابتسامة طمئنته وقالتله بهدونها:

-وأنا معاك مهما كان الوقت..

خرجت منها الجملة أزاي هي مش عارفة! أزاي مصدقاه ومش خايفة يكون بيضحك عليها؟ و أزاي وافقت تستناه وتتحمل تشيل همه وهي محتاجة اللي يشيل همها هي مش عارفة!

كمل كلامه وبدأ يكلمها علي غيرته الزيادة وعن طقوسه في الغيرة، بدأت تحس بالإختناق من كلامه، حست أنه هيتحكم فيها وهيكتبها، شافت في خيالها مشهد خلافهم المتكرر، وكلمة ماتكلميش ده وماتسلميش علي دول ومافيش خروج ومافيش ضحك ومافيش...

-بسنت...روحتي فين؟

فاقت من شرودها وأتهدت تنهيدة مخنوقة بتخرج كم خوف كبير من جواها، ملامحها بان عليها التغيير، اتناقشت معاه واستغربت أنها وافقته علي كل اللي قاله لكنها حطت طول وسط عشان تفضل معاه!! مش مرتاحة لأسلوبه ودماغه، وخايفة لأنها شايفة أن دماغه غير دماغها، أومال ليه مستنية معاه وماعترضتش ومشيت؟ ليه مكملة رغم كل الكركبة اللي حستها دي؟ كل دي أسئلة بتدور جواها، فضلت ساكتة، وهادية، وبتسمعه وهو بيكمل كلامه وبصاله وبتأمله، كل ما تخاف وتبصله تحس بالأمان وحد من جواها يهمس ويقولها \*خليكي معاه\*

أتناقشوا في موضوع الشغل وهنا ماقدرش محمد يتحكم في عصبيته، وهي ماقدرتش ماتتضايقش وتنفعل ولكن انفعالها كان بهدوء عجيب هي مش قادرة تفهمه...

وفي الآخر وصلوا لحل وحيد هي أقترحته بعد نقاش طويل هلکوا فيه جدال...

-خلاص موافق تشتغلي لحد أول بيبي يجي..بس وقتها ماتجيش تقوليلي أنا هكمل.

ابتسمت بقلق وهي بتحركله راسها بأنه لا ماتخفش، ولكن قلبها مش مقتنع  
ولا عقلها بأنها تستسلم للفكرة دي...

عدي اليوم بسلام، وقبل ما تمشي قالتله بضعف:

محمد أنا زي ماطلبت مني عمري ما هخرج سرنا برا ولا هشتكيك لحد  
غيرك، أنا حاجي أشتكيلك منك فلما أعمل كده ماتجيش عليا  
واحتويني... عشان وقتها أنا هكون أختارتك أنت عن العالم كله عشان  
ياخدلي حقي منك

..ماتقشاش عليا عشان أنا مش حمل ضغطة كمان.

\*\*\*

بتيجي علينا فترة كركبة، شوية مشاعر داخله في بعض، وأفكار كثير  
بتتعارك جوا عقولنا، بنعيش في أرق، وضغط نفسي، ماشيين تايهيين،  
ومش فاهمين... أصوات جوانا بتتكلم مش سامعين حد منهم معين؛ كل  
الكلام متداخل وبيتردد جوا ودانا كأنه صريخ متعب، دوشة مجهدة جسدياً  
قبل ما تكون نفسياً... بنبقي مش قادرين نحدد ولو شعور واحد حاسينه،  
مش عارفين أحنا عايزين إيه؟ وليه؟

الفترة دي مش سهلة، رغم أننا من برا نبان صامدين وهدوءنا ده راحة،  
لكننا من جوا محتاجين معجزة تطفى النار اللي بتحرقنا من غير  
سبب... في الوقت ده لازم حاجة واحدة بس تتصرف، اليقين... لحظة يقين  
قادرة ترتب كل حاجة، قادرة تفوقنا و تخلينا نفهم كل حاجة دايرة جوانا  
وتريحنا...

زي بالضبط ما حصل مع محمد وبسنت، كانوا بيعانوا في أول أسبوعين  
ليهم في الإرتباط، عدم فهمهم لبعض وخوفهم، وكمان الكسور اللي جواهم  
من العلاقات القديمة خلاهم يحطوا لبعض حواجز، مافيش ثقة، أو يمكن

موجودة لكن مهزوزة...كل واحد فيهم مش قادر يرمي كل كروته للتاني لا  
يستخدمها ضده ويتئذي، بيحاولوا يحموا قلوبهم وماكانوش يعرفوا أن هو ده  
الشيء اللي هيخليهم يتندوا...لحد ما جت لحظة اليقين...

بصوت ببيكي:

-محمد أنا جالي عريس..

ببرود:

-ماتوافقيش..

خلافات وصراع بين قلبين مأذيين ومش فاهمين بعض، بسنت بتحاول تفهم  
محمد بمساعدة عادة، أن مافيش حاجة أسمها ماتوافقيش إلا لو عندها  
أسباب، وهي خايفة لأنهم مستحلفين ليها المرة دي بسبب كثرة رفضها ولو  
العريس اللي صاحبتهم جابته ليها ده راح لأهلها وطلع كويس هيجبروها  
تقعد معاه.

محمد مش مقتنع أن في حاجة اسمها إجبار لأنه مش فاهم دماغ أهلها بتفكر  
أزاي، وأييه المعاناة اللي هي بتعانيها في الحوار ده وغضبان، شايف أنها  
كان لازم ترفض أنه يجي من البداية أصلاً..

جدال مؤلم كل طرف فيهم مش قادر يلتمس للتاني عذر، وشايف أن موقفه  
الوحيد السيء في الوضع ده....

في اليوم اللي العريس كان جاي فيه يزور أهلها، وقفت بسنت قدام محمد  
بتتوسل ليه من جواها وبتقوله بصوت بيستنجد بيه أنه يتمسك بيها ولو  
بجملة:

-يا محمد طمني..

بصلها وكله غضب وبنبرة قاسية قالها:



-أنتي اللي حطيتي نفسك في المشكلة دي بيبقي أنتي اللي تخرجي نفسك منها، أنتي عارفة أنني مش هقدر أجي خلال الأيام دي من الأول ووافقتي...يبقي هظمنك بأيه؟ أقولك أنا جاي النهارده عشان اخرج نفسي وأمشي؟

سابتة ومشيت وجواها خذلان، مكسورة خاطر والدنيا قدامها سوده، الهوا اللي بتتنفسه بيألمها، كل حاجة طعمها مر، كان جواها ندم أول مرة تحس بيه، كانت بتلوم نفسها كل لحظة أنها اتسرعت، كانت بتنقسي علي قلبها بعتاب لازع، في اليوم ده قررت أنها هترفض العريس مهما كان التمن، زي ما مش هتكمل مع محمد وهتكمل حياتها وحيدة....

\*\*\*

بعد يوم متعب وليل مليان تفكير قاسي، كلمته بعد انتظاره ليها، وكل حاجة فيه بنتحرق علي الهادي، بتعاتبه وتتجادل معاه بعد ما قائلته عن رفضها للعريس، بتنقسي عليه بكلامها وكلامها بيئذيه، زي ما هو بيئذيهها بعدم اعترافه بغلظه من غير ما يحس، حس أنه فعلاً بيفقدها بكلامهم علي الشات، عايز يشوفها، أو علي الأقل يسمع صوتها ويحسوا ببعض، حاسس أن الشات دافن احساسهم وده مستحيل يحل المشكلة، كتبلها:

مممكن أتصل ونتكلم وأحنا سامعيين بعض أكثر عشان نحس بمشاعر بعض..

بعد ما اتصل بيها سمع منها نبرة قاسية أول مرة يسمعها، نبرة رغم أنها واجعاة ومخوفاه، مزعلاه عليها، بتتكلم بكل غل ومش فاهم هي ليه بتعمل كده؟

بحرقة قلبها ودموعها سألت قائلته:

-أنت أبسط شيء طلبته منك ما عرفتش تعمله، أنا كل اللي طلبته منك أنك بس تظمني...كان ممكن تقولي اتمسكي بيا يا بسنت وأنا والله مش هسيبك وهعمل عشانك، كنت وقتها مستعدة أقف قصاد العالم كله لكنك استكترتها

عليا...أنا عمري ما هعرف أكمل حياتي مع واحد ما عرفش يطمني...أنا  
مش عايزة أكمل يا محمد.

ماكنش مصدق أنها بتقوله كده، سألها تكمل إيه؟ وقتلته بخنجر مصدي لما  
أكدتله إن هي عايزة تمشي..

بضعف قالها:

-بسنت راجعي قرارك، أنتي اللي هتكوني أختارتي.

بقلب بيصرخ فيه ماتسبنيش قالتله:

-أنا اختارت..ومش هكمل.

بكت بصوت مرعب، وما بين نهبتها فضلت تتكلم بصوت مهزوز مع حد  
مش موجود وتقوله:

- ماتسينيش أعمل اللي في دماغي يا محمد أرجوك، أنا مش عايزة امشي  
أنا عايزة أفضل، انا محسنتش بوجودي غير معاك، مالفنتش نفسي غير  
وأنت في حياتي، مابقاش قلبي يدق الا لما بدأ يحس بيك... ماتسينيش  
أمشي، أنا مش عايزة أمشي والله..

سمعت باب غرفتها بينتقل وحد بيدخل، حاولت تسكت دموعها ماقدرتش،  
قعدت آلاء صاحبته قدامها علي السرير مفزوعة ومرعوبة من منظرها  
اللي بتحاول تداريه عنها وسألته:

- هو مين ده اللي مش عايزة تسيبيه وتمشي؟ وليه هتسيبيه اصلا؟

اترمت في حضنها وزاد بكاهها، جفونها مغمضة بقوة، ضحكته مش مفارقة  
خيالها، صوته اللي كان بيهددها ماعدش موجود عشان تهدي وتحس بأمان،  
فبدأت تتكلم بألم:

-خليه مايمشيش يا آلاء، فهميه أني بحبه والله وعايزاه، فهميه ان مش ده  
السبب اللي مشيت عشانه، قوليله أني غصب عني عملت كده  
عشانه... قوليله اني حاولت افهمه أكثر من مرة بس ماقدرتش لان السبب  
هيجرحه ويضغطه...

قاطعت كلامها آلاء وهي بتطبطب عليها:

- يا حبيبتي طيب مين هو وإيه اللي حصل فهميني وانا احاول  
اساعدك... اهدي بالله عليكي عشان نحاول نحل لأي حاجة.

اعتدلت بسنت وقعدت قدام آلاء وبدأت تاخذ نفسها وتتنهد، كل ما تمسح  
دموعها بيحي غيرها تاني وده بيزيد توترها، قامت آلاء وجابت ليها مياه  
وشربت منها شوية قليلين، بعد دقائق هدبت فيهم إلي حد ما بدأت تتكلم،  
ومع كل كلمة وكل نفس بيطلع منها قلبها بيحاول يحطم ضلوعها ويجري  
منها يروح ليه:

محمد...محمد أنا حبيته بجد يا آلاء، بس أمبارح اضطريت أقوله مش  
هكمل...

بدأت دموعها تسيل مرة ثانية وهي بتكمل كلامها:

- أمبارح حصلت حاجة خالتي اتأكد أنه لما يحي يتقدملي بنسبة كبيرة  
هيترفض، حاولت أصلحها معاه واوصل لحل بشكل غير مباشر بس هو  
ماطمئيش منها ولسه شايفة أنها سبب يخليهم يرفضوه ماقدرتش اصارحه  
لأنه مضغوط اصلا، ولو كنت اتكلمت معاه فيها كان هيتئذي، ولو كملت  
معاه من غير ما أقوله وجه يتقدملي وما وفقوش عليه احنا مش بس هنتئذي  
أحنا هنتكسر...

اهتزت نبرة صوتها وبدأ جسمها يرتجف وأضافت:

-هو مضغوط، ومستعد يضغط نفسه كتبيير عشاني، ولو كملنا للنهاية  
هيفضل يطحن نفسه كل يوم وكل ساعة عشاني فلو اترفض في النهاية أنا  
هجلد نفسي بحق كل يوم تعب نفسه عشاني يا آلاء..

قامت آلاء من مكانها وقعدت جنب بسنت وضممتها لحضنها وبدأت تتكلم  
بقلة حيلة:

- الموضوع يحير فعلاً، طيب هو عمل إيه لما قلتيله مش هكمل؟

دفنت راسها جوه حضن آلاء وقالت بصوت مكتوم:

- قبل ما أقوله كأن قلبه حاسس أنني هنهيهها فضل يقولي انا عايزك ومش عايز موضوعنا ينتهي، واول ما اختارت اني مش هكمل سابني أعمل اللي انا اختارته...

كان نفسي زي ما بييجبرني ما اكلمش صحابي الولاد، وأشيل صوري من الفيس وما اتأخرش بره البيت، يجبرني أستني، يجبرني افضل معاه للأخر..

بدأ الحزن يعرف طريقه لقلب آلاء، واحساسها بالعجز مش مساعدتها تفكر في أي حل، قالت:

- بس هو غصب عنه برضه يا بسنت، الموضوع مش سهل عليه أبداً... وخلص طالما أنتي اللي اختارتي للأسف لازم تتحملي تمن اختيارك مهما كان ألمه.

خرجت من حضنها وبصتلها من بين دموعها، ودبلان ملامحها:

- أنا عارفة أنني اذيته ووجعته، بس أنا موجوعة الضعف عليا وعليه...مش قادرة اتحمل فكرة أنه حزين، أو شايف انه متهان، مش قادرة أكون سليمة وانا عارفة قد إيه لما بيتخفق بيحرق كم سجائر، ومش بياكل ولا يشرب ولا بينام، مش قادرة أتخيل تكشيرته وعصبيته...ومش قادرة أتقبل فكرة ان أنا السبب...

زفرت آلاء بقوة وسألتها بحيرة:

-طيب والعمل؟ هتسيبي الأمر يمشي كده؟

--مش قدامي أي حل تاني يا آلاء، مش هقدر أقوله أي حاجة، مش هقدر اضغطه، ومش هقدر اسيبه مكمل علي عماه...ومش هقدر أرجعله في يوم لأنه عمره ما هيقبل وجودي تاني بعد ما جرحته...

سكنت آلاء وهي باصالها بعجز وسألتها:

-ندمانة يا بسنت؟

--أنا عمري ما ندمت علي حاجة، بس لو هندم فأنا هندم أني خسرت أجدع  
وارجل وأحن وأطيب حد في الدنيا...

-طيب إيه هي الحاجة اللي حصلت؟ أو إيه اللي ممكن يرفضوه عشانه؟

\*\*\*

سهل الإنسان تحوله كثرة الخذلان، وتكرار الأزمات لوحش، سهل يثور بعد  
سنين من الصبر والهدوء، المرة دي الكسر اللي أتكسره محمد مش سهل،  
بسنت كانت آخر حلم محمد يحلمه، آخر أمنية يتمناها من ربنا، صدق  
خلاص كلامهم، الناس دي كلها فعلاً مابتكديش.. هو مش بيكمل أسبوعين  
في أي ارتباط، هو مافيش حاجة فيه تتحب عشان حد يحبه ويستمر  
معاه، الكسر اللي أتكسره من بسنت أذاه بشكل واضح في ملامحه الدبلانة  
واللي نسيت الابتسام، في السجاير اللي مابتطفيش كأنه بيقلها بيها أنتي  
ماكنتيش عايزاني أسيبك وأمشي بالسجاير بس أنتي مشيتي... وأنا همشي  
بيها، في النوم اللي مش عارف يقربله، في دموعه اللي مش بتنزل علي حد  
ولا علي حاجة لكنها استسلمت المرة دي...مش عارف هو صعبان عليه  
نفسه، ولا زعلان أنه مش هيقدر يكون معاها تاني..ولا بيشتكي الدنيا لربنا  
بيها..

مع كل اللي حاسس بيه واللي بيعانيه من وقت ماسابته، مش قادر مايطمنش  
عليها ويتابعها من بعيد، مش قادر مايشتاقلهاش، وحشته ضحكتها، محتاجها  
تهدي ألمه زي ما كانت بتعمل، بس المشكلة أن هي المرة دي سبب الألم..

3أيام مش قادر ينطق بكلمة مع حد، مش عارف ياخذ قرار يرجع الشغل ويفكر يقدم استقالته...قرر أن حياته تنتهي هنا، هو هيكتفي أنه يعيش الباقي من عمره وحيد وخذلان.

\*\*\*

-يابسنت بالله عليك اللي أنتي فيه ده مش هينفع، أنا أول مرة أشوفك في الحالة دي، أنتي كده هتموتي مني وأنا عاجزة أتصرف.

كانت عادة بتبكي وتصرخ بقلة حيلة في سماعة التليفون لبسنت اللي مابتتحركش من علي سريرها والمرض هدها، كانت أول مرة مناعتها تشاركها الحزن وتتعب صحتها، 3 أيام مرضت فيهم بسنت وماحدش عارف يشخص حالتها غير بأن الوضع اللي هي فيه نفسي وليس جسدي، مابتبطلش بكا وتفكير، لومها المتكرر لنفسها وكرهها للظروف بيهدوها في كل ساعة عن الثانية، بتصرخ من جوا ومن برا بصوت مسموع بكل اللي نفسها تقوله ليه بس مش هتقدر، مابتخرجش من شات محمد، ديماً قاعدة فيه، نفسها تكلمه أو تظمن عليه، نفسها الكابوس ده ينتهي..

-عادة لما أموت أو أتجوز أو يحصل أي حاجة بعد عمر طويل، عرفي محمد أني والله ماظلمته، عرفيه أني حبيته فعلاً وكنت عايزاه وماكنش ده السبب اللي مشيت علشاناه...خليه يسامحني لأنني مش مسامحه نفسي.

\*\*\*

ماقدرش محمد يقاوم رغبته في أنه يكلمها، بعثلها، كان خايف تحرجه تاني، ندم أنه بعثلها وفكر للحظة يمسح الرسالة لكنها فجأة ردت، كانت مش مصدقة عينيها انها شايفة رسالة منه، ردت عليه وهي ملهوفة، كان بيظمن عليها، هي من جواها بتقوله أنا بموت من غيرك، بس صوابعا كتبتله أنا الحمد لله بخير، وأنت؟

هو نفسه يقولها مش عارف الاقي نفسي وأعيش من غيرك، بس كتبها أنا الحمد لله تمام...

أتكلموا شوية في أي حاجة، ماكنش مهم مضمون الكلام قد ما كان كلامهم مع بعض الدقائق البسيطة دي بيسكن الامهم، بدأ الكلام يسكت ويتعاطبوا بالأيموشنات، هي بتحب لغة الإشارة وبتفهمها، بس ماكانتش مصدقة انه في آخر العتاب قالها بحبك بلغة الإشارة.. سألته أكثر من مرة أنت مدرك اللي بنقوله بالأيموشنات ولا لا.. جاوبها بأن أه، مش قادرة تستوعب ولا تصدق أنه بيقولها أنه موجوع منها ونفسه يقتلها لكنه لسه بيحبها وعايزها للأبد... ومن غير مايكتب كلمة كله بالأيموشنات ولغة الإشارة...

أنفقوا هيرجعوا الشغل سوا وأنهم لسه أصحاب، بس بسنت كانت مش قادرة تعترف من جواها ان موضوعهم أنتهي وأنهم أصحاب، هي لسه بتحبه وعايزاه مهما كان التمن، هي مش هتستسلم.. مش هتعمل حاجة غير أنها تدعي ربنا، غمضت عينيها بعد ما قفلت معاه كلام ودعت ربنا وهي قلبها بيتألم

\*يارب أعمل معجزة.. أعمل معجزة تصلح الأمور\*

فتحت شات معين وكتبت فيه

-النهارده 2019/11/14 الساعة 5 بعد الفجر، مش عارفة أقولك إيه غير أن ده أكثر وقت محتاجالك فيه، مش عارفة أنت ولا لا اللي في بالي بس أنا محتاجة وجودك، أنت أكيد لو هنا كنت هتهون عليا، أنا موجوعة أوي... بتمني لما تيجي وتسالني كنتي موجوعة ليه أجابك بأنها كانت معركة انا انتصرت علي وجعي فيها.... بحبك.

كانت اسوأ المراحل اللي مرت بيها خلال الأيام اللي فاتت أنها تروح المدرسة وتشوف المدرسين والمدرسات وماتسلمش من نظاراتهم اللي بتئذيها، وابتسامات الشماتة اللي بيتناقلوها بينهم وبين بعض عليها وجعها ازيد من وجعها اضعاف، الأكثر وجع محمد... نظراته القاسية اللي كلها لوم، تعامله معاها بشخصية غريبة هي أول مرة تشوفها بيضغط علي جرحها أكثر، متجاهلها طول الوقت وهما في غرفة المدرسين، ماقدرتش



تتحمل أكثر، بصت لغادة اللي بتحاول تهون عليها لكنها مش عارفة، قالتها بصوت يبقاوم البكا:

-أنا خارجة مش هقعد هنا وماتجيش ورايا محتاجة أكون مع نفسي أرجوكي ما تجيش.

سابتها غادة براحتها رغم أنها مش قادرة تتحمل تسببها لواحدتها، خرجت بسنت ومحمد باصص عليها لكنها مش شايفاه، دموعها ماسابتهاش لوحدها وشاركتها اللحظة وهي بتدور علي مكان بعيد عن الأنظار تقعد فيه، قلبه مقبوض وحزين، ورغم ده كبرياءه مانعه يسألها رايحة فين!! قلبه بيناديلها وعينيه ماشية معاها لكن جسمه ساكن مكانه، دخلت بسنت فصل فاضي وقعدت جنب الحائط تبكي بعد ما قفلت تليفونها علشان غادة ماتوصلهاش، حاضنة نفسها ودموعها بتواسيها، بكل مافيه من ألم وندم بتقول من جواها يارب أعمل معجزة...

في اللحظة اللي محمد رن عليها فيها ولقي تليفونها مغلق وقلبه أتخض، كانت غادة وصلت لمكانها، حضنتها وفضلت تبكي علي كتفها وتقولها:

ماكنتش أعرف أني هحبه بالقوة دي، ماكنتش فاهمة مشاعري إيه بس يوم مافهمتها مابقاش ليا الحق أحسها... أنا بكرهني، وبكره الظروف، أنا عايزة أمشي... أنا همشي.

مسحت دموعها وسابت حضن غادة، جت تخرج من باب الفصل شافته واقف قدامها وباصصلها بهدوء وقلق، الزمن من حواليتها وقف وقلبها لوحده اللي دق، هو شايف أثر الدموع اللي في عينيها وعلي خدها، أول مابص في عينيها حس أن كل حاجة فاتت مالهاش لازمة قصاد ملامحها الحزينة دي، كبرياءه ماعدش ليه وجود قدام دموعها، حن... وأول مابصتله حست بالأمان... كأنه حاوطها من الشر اللي بيحوم حواليتها بجملته اللي قالها بصوته ونبرته اللي مابيطلعوش بالحنية دي غير ليها، واللي من أول اليوم كانوا متغيريين.. لما سمعته بيكلمها بيهم دوب من قلبها الخوف:

-عايزة تمشي ليه؟ سيبينا يا عادة لوحدنا معلش..

عيونها كانت بتستجد بغادة وهي ماشية، سابتهم لوحدهم، محمد طلب منها يبقوا عند السور الحديد علشان يعرفوا يتكلموا، سألها كتير عن سبب أنها عايزة تمشي، كانت بتتهرب من نظرتة بس مش قادرة تمنع ابتسامتها بسبب الطمأنينة اللي مديهاها وجوده قدامها ونبرته اللي لسه فيها حنية، مش عارفة تجاوبه غير بجملة أنا مش عايزة أقعد معاهم، أنا مش عايزة أشوف الناس، ولكنه كان مصر يعرف السبب وبعد وقت طويل قررت تصارحه:

-مش قادرة أشوف نظراتهم واتحمل الفكرة اللي في عقولهم... وعقلك، مش معترفة بأن كل حاجة انتهت زي ما كلكم شايفين؛ لأنها عندي ما انتهت، أنا بالفعل مامشتش..حتي لو نطققتها فكان غصب عني، ومشاعري مش مستسلمة لرغبة الظروف...أنا لسه مقتنعة أننا لبعض ومع بعض...ماعرش ده أزاى رغم أنك كرهتني ومش هتسامحني بس أنا مش قادرة أشوف نفسي مع حد غيرك..

بصالحا باستغراب، كلامها خارج بصدق،طيب ليه مشيت؟

سألها بنبرة مخنوقة:

-أنا ماكر هتكيش يا بسنت، ومسامحك والله، بس ليه مشيتي يا بسنت؟

بصتلها بزل وقالته وهي زعلانة من نفسها انها هتقوله كده:

-مشيت علشان أهلي كانوا هيرفضوك لو جيت وأنا خفت من أنك تعمل كل ده علشاني وتيجي وتتكسر في النهاية، قلت أكسر نفسي لكن ما تتكسرش أنت...

لما جه العريس أعمامي رفضوه علشان ما عندهوش شقة وهياخد شقة إيجار، وأنت مش معاك تجيب الشقة وأنت مفهمني أن مقدورك نعيش أول كام سنة

إيجار وهتطحن نفسك عشان توفرها...خفت أجي أضغتك وماهنش عليا  
أعمل ده فيك..لذلك مشيت عشان ماتحسش بكلامي أني بقولك أني عايزة  
أكثر من اللي بتقدمهولي...هو أنت فاهمني؟

بصلها بغضب ووشه أحمر وضغط علي سنانه من الغيظ وده خوفها، لكن  
مهما كانت ردة فعله هي هتتحملها، مرة واحدة ضحك جامد وهي بصاله  
باستغراب، قالها بكل آسي وندم:

-أنا كل اللي فاهمه أنك غبية... غبية أوي بجد، أنتي مفكرة انك كده  
حميتيني، أنتي فعلاً كسرتيني، هو ده اللي مشيتي عشانه؟ عيبك أنك  
ماصدقتنيش، هو أنا مش قللتك أنا مستعد أعمل أي حاجة؟..أنا مستعد أني  
أعمل أي حاجة عشانك أنتي بقي اللي فاهمة الجملة دي؟

قلبها دق بسرعة وسألته بكلام متلغبط:

-يعني...انت تقصد...استني بس، أنت تقصد إيه؟

ابتسم وعينيه في عينيها وقالها:

-يعني تعالي معايا نرجع أوضة المدرسين وأحنا سوا...

مشي قدامها خطوتين وبصلها وهو مبتسم وفرد ذراعه يشاورلها بيه أنها  
تفضل تمشي معاه، ابتسمت وهي بتحاول تستوعب هو قصده كده فعلاً ولا  
لا، أخذوا عادة في طريقهم اللي قلبها ميت من الرعب وبصالحهم مش فاهمة  
حاجة، في الكام خطوة دول كانوا بيفوقوا علي صدمة أن كل اللي حصل ده  
كان في 3 أيام بس، مش مصدقين أن السنين اللي عدت بطيئة ومؤلمة دي  
كانوا مجرد أيام بسيطة، أول ما دخلوا غرفة المدرسين وهما جنب بعض  
بصوا لبعض وضحكوا جامد، بصتلهم عادة ورجعت بصت للمدرسين  
وشافت نظرات الدهشة وملامح الضيق علي بعض منهم، والصدمة علي  
ملامح الكل فضحكت هي كمان وفهمت....أن لسه اللي جاي فيه أحلي.

\*\*\*

بيعدل شعره بإيده قدام المرايه وبيبص لنفسه وبيتسم بارتياح، رش رشة خفيفة من البرفن علشان عارف أنها مش بتحب البرفن ومش حابب يزعجها في يوم زي ده، كلامها من شهرين فاتوا بيتردد في عقله بصوتها، فإكر وقفها قصاده قبل ما تركب الميكروباص وتروح بيتهأ بعد ما أنتهي اليوم الدراسي يوم ما رجعوا لبعض:

- اللي حصل ده كان جواه رسالة مخفية تفهمنا إنا إيه لبعض، كانت رسالة تفهم كل حد فينا حقيقة مشاعره وموقفه تجاه الثاني... كان ممكن استسلم، كانت جروحي قادرة تسيطر علي أي قرار بيقولي خليك معاه، كان جايز لما أتعب زيادة وأنا قلبي هل كان أهرب... بس أكتشفت أن القلب رغم ضعفه قادر يتحمل أي آسي ويتحمل ثاني لمجرد أنه عايش بالحب، أكتشفت يومها أني مش عايزة من الدنيا غيرك، رغم زعلي منك، وخوفي اللي مالهوش حدود.. رغم ألمي اللي ماكنتش قادرة أتحملة، كانت روعي عايشة ناقصها حاجة في الوقت اللي مشيت فيه، كنت بصرخ من جوايا ومع ذلك قلبي بيناديلك عشان مش حاسس أمان لأنك مش موجود، أنا أكتشفت يومها أنك مش مجرد علاقة أرتباط أنا داخلها جديد، أنت جزء مرتبط جزئي كله عشان نكمل حاجة واحدة هي إنا... أنا بحبك يا محمد  
ماتمشيش ثاني ♥

ابتسم أكثر وهو باصص لنفسه في المرايه، مسك تليفونه، فتح واتساب وسجل تسجيل صوتي:

-أنا وعدتك وعدين... أول واحد فيهم أنا يمكن أه ضعيف فيه بس والله هوفي بيه، ومحتاجك تصبري عليا، والثاني هوفي بيه النهارده...مش مصدق نفسي حقيقي، كنت قربت أصدق أن ربنا مايبحبنيش، بس فعلاً ربنا عوضني بشكل غريب فيكي، كأن كل حاجة صبرت عليها كان مكافئتها بنتكون عشان تبقي أنتي...أنا ربع ساعة وهتكون دبلتي في إيدك، بس لازم قبل ما اشوفك بفتان الخطوبة أقولك أنك أحلي وأعظم أنتصار من ربنا  
ليا... بحبك ♥

بتسمع التسجيل الصوتي وقلبها بيتنطط جواها من الفرحة، هي مش مصدقة أن خلاص بقوا مع بعض وقدام كل الناس هي شيء يخصه، أول مرة اللحظة دي تيجي وتكون هي مبسوطه بيها، لحظة الخطوبة..كانت اسوأ لحظة بتمر عليها أو هتمر هي بيها، بس ربنا استجاب لدعاءها وعمل معجزة...معجزة بأن بسنت تفهم أن الحياة مش ديماً وحشه، وإن كل وحش بيجي بعده مكافئة حلوة...حتي لو طال الإنتظار، وكل ما طال، كل ما كان الشعور بالسعادة أكبر...

جرس باب شقتها رن، وسمعت أصوات أصحابها كلهم بره غرفتها بيذغردوا، ومبسوطين، ضحك كثير وأصوات اسرتها سعيدة، بيستقبلوا محمد وأهله وأصحابه، ارتبكت وقلبها من التوتر وكتر الدق مش مديها فرصة تتنفس بهدوء، بصت لمرايتها وابتسمت بخجل، خبطت غادة علي باب غرفتها تستدعيها تخرج لكن بسنت رفضت وطلبت أن والدة محمد أول حد يدخل يشوفها وهتخرج ليهم معاها، الكل استغربوا من طلب بسنت، دخلتها والدة محمد، ست جميلة ملامحها هادية، سن الخمسين مش بيعبر عنه ملامحها تماماً، تبان أصغر...أول ما شافت بسنت بفتانها الموف وحجابها الأبيض، والميكب الخفيف اللي بارز جمال ملامحها أبتسمت بمحبة وفضلت تردد "ما شاء الله، تبارك الرحمن" بصوت مسموع، بعد ما باستها وحضنتها قعدت بسنت علي طرف السرير وقعدتها قدامها، بسنت مجهزة كلامها من وقت طويل، بس ده ما منعهاش تحس بالتوتر ورهبة، بصت في الارض وقالت بود:

-أنا محتاجة قبل ما دبله محمد تكون في إيدي وتكون علاقتنا رسمي بتبتيدي، علاقتي بحضرتك هي اللي تبتيدي الأول...أنا عايزة أقولك حاجة، أنا بنت عاشت طول حياتها لمامتها، ومع مامتها، مافيش في حياتي غيرها..اتحرمت من الاهل واللمه، اتحرمت من إحساس الحنية وحاجات كثير، حالياً كلها شهرور وهتبقى أنتي أمي، وعيلتي وأهلي اللي مش

موجودين...وأنتي هتكوني أمي الثانية اللي بعد عمر طويل هتاخذ مكان والدتي بعد الشر عنها...فأنا بوعدك تحسي اني بنتك مش مرات أبني، مش هكون شخص بيئديكم ولا هيفكر في ده أبداً؛ لأنني هكون محتاجالكم قبل أي شيء، بتمني تقبليني بنتك وأني لما أحس بأن محتاجة ضهر ياخدلي حقي من محمد لما يزعلني، أقدر اترمي في حضنك أنتي...

بكت أم محمد من صدمتها من الكلام، ومن دموع بسنت اللي تلقائي خرجت مع الكلام، حضنتها تاني وقالتها بأمومة:  
-وأنا من النهارده ولادي زادوا بنت جميلة أسمها بسنت.

خرجوا الأثنين إيديهم في إيد بعض قدام عيون الكل، بصلهم بسعادة مع اندهاش من أثر الدموع اللي شايفنها علي وشوشهم، قلب محمد دق بسرعة أكبر من أي وقت فات، دق بكل يوم دعا ربنا فيه بيها، دق بكل لحظة حسها فيه، وبكل نظرة شافتها فيها عينية ودق قلبه وارتاح...كانت جميلة بشكل اسطوري، كان حاسس أنها أميرة، جوا عقله وعد نفسه وعد جديد...أنه مش هيجي عليها ولا يزعلها أبداً، علشان ابتسامتها ولمعة عينيها دول مايفتوش، كانت خطوبة عائلية جميلة، الكل مبسوطين وقضوا وقت ممتع، عدت ساعات واتبقي محمد مع بسنت بعد الإحتفال، قاعدين يتعشوا مع بعض علي السفرة، محمد بياكل ومع كل معلقة بيرفعها لشفافيه يبص لبسنت ويبتسم، كأنه لسه بيستوعب، بسنت بصاله وسرحانة وبعد ثواني سرحت في دبلته اللي حاضنة صباعها فضحكت بطفولة، بصلها بسعادة ومسك إيديها طبطب عليها بحنية وقالها:

-أطمني...أنا معاكي♥

بعد ما أكلوا طلبت منه تليفونه، كان مستغرب لطلبها بس مااعترضش واداه ليها بعد ما سجل خروج من فيس بوك زي ما طلبت، سجلت دخول لأكونت وادتله التيفون وقالتله:

-الأكونت ده عليه شات واحد بس، شات ليا أنا...الأكونت ده كنت عملاه بكلم فيه الشخص المجهول اللي ربنا كاتبلي أحبه ويحبني، كنت بكلمك فيه لحد ما تظهر..لحد ما اطمن أنك أنت اللي أقدر أفتحله قلبي ويشوف جوايا

ده عامل أزاى، كان رغم أن حواليا أصحاب وناس ودباديب.. كان في حاجة ناقصها وهي أنت، كنت معتبرك مسافر وراجعلي وبكلمك لحد ماتيجي، وأنت ظهرت، وحببتك.. وأطمنت أنك الشخص اللي يستحق يشوفني من جوا ويقرأ لحظات ضعفي، ويشاركني فرحتي وحزني من قبل حتي مايجي...

الأكونت ده فيه كلامي ليك باليوم والتاريخ والساعة من قبل ما اعرفك بسنتين، وكلامي ليك بكل تفاصيلنا من أول ما ظهرت وحببتك، فيه كل الكلام اللي استخبي عنك وماقدرتش اطلعها لك.. خذ وقتك وأقرأه، وهستني تقولي استنتجت ايه وحسيت ايه.

\*\*\*

قاطع كلامها صوت رجولي قوي جاي من جنبها بيقول باستنتاج:

-اااه يعني أنتي يا ماما لما كنتي بتفتحي شات معين كل كام يوم وتبعتي مسدج لحد، كنتي بتبعتيها للأكونت الفاضي ده، عشان لما زوجك المستقبلي يجي تخليه يقرأ رسايك ليه، ولما بابا جه وحبتيه ادتيله قرأ كل ده..

ضحكت بسنت بضعف، رغم العمر اللي مر والتجاعيد اللي اتصاحبت علي ملامحها، لسه ضحكتها ناعمة وطفولية، فاقت علي جملة بعد ما كان عاد بيها الزمن ل 25 سنة فاتوا، كانت تاهت جوا الماضي واندمجت معاه وهي بتحكيهم، بصت ليه لقت يونس صاحب ال 24 سنة قاعد زي الطفل علي الكرسي جنبها مربع رجليه وساند دراعاته عليهم وحاطط ايديه تحت خدوده ومندمج في القصة، وخطيبته فرح قاعدة جنبه حاضنة مخدة كنية الأنثريه ومركزة ومبتسمة، وكانت منه قاعدة تحت الكرسي اللي قاعد عليه يونس اخوها ومتحمسة تسمع باقي القصة من مامتها، وباقي أفراد العيلة قاعدين حوالينها علي الكراسي بهدوء ولامحهم منصتة ومترقبة تعرف الباقي، ركزت حوالينها في تفاصيل الشقة والزينة والبلالين اللي مالين الشقة، الموسيقى الهادية والحلويات اللي في الأطباق منتظرة الحفلة تبتدي... ابتسمت بفخر... هي مش مصدقة أن من 2017 ل 2067 القصة هتفضل بتفاصيلها وحيويتها بالشكل ده، رغم تغيير الزمن، وتغيير الجيل

والملاحح... لسه القصة هي هي، ولسه احساسها بالتفاصيل لسه هو... سألتها  
منه بنت الـ 20 بلهفة:

-طيب ولما قرأها يا ماما، عمل إيه ولا قالك إيه؟

بصتلها وضحكت تاني وبدأت تكمل حكي:

-يومها بباكي مانمش، بعد ماروح بيتهم كلمني وأطمن عليا وحب فيا زي  
اي اتنين بيمروا بوقت الخطوبة، بس لما سابني عشان يروح ينام مانمش،  
يومين كاملين بيقراً... يومين كاملين بيعرفني أكثر، بيشوف نفسه من عينيا،  
بيشوف قد إيه كان مهم بالنسبالي من قبل ما يجي...

أتصل بيا بعد يومين ولقيته بيدمع، أنا ما شوفتش بس حسيت... صوته  
مهزوز بس فرحان، قالي اللي عمري ما هنساه.. قالي:

-مش قادر اصدق أنك حقيقية.. ماكنتش قادر اصدق أنك معايا، وأني فضلت  
اتمناكي من ربنا سنه كاملة وكنتي دعوتي الوحيدة في رمضان وبعد كده  
ربنا سمعلي وجابك ليا.. دلوقتي أتفاجئت وأنا بقرأ أنه ماكنش ناسيني،  
ماكنش بيكرهني... كل حاجة كتبتها في مسدجائك عني قبل ما اجي وكنتي  
بتتمنيها... أنا عملتها من غير ما اعرفها... كل حاجة كنت محتاجها منك  
وكنت بدعي ربنا بيها كانت فيكي من غير ما اعرف وربنا هو اللي حطك  
في طريق عشان أنتي إجابة دعوتي... دلوقتي بس فهمت معني أسم كتابك  
(رسائل مخفية)...

ظهورك قدامي وقت ما كانت حياتي بايظة وكنت كاره الحياة وشايف كل  
البنات كائنات زبالة، كان رسالة ليا تقولي أن الحياة لسه فيها أحلي وأن  
مش ده الطريق اللي ينفع تمشي فيه.. في طريق تاني أحلي، هو اني أحبك  
وأخذ خطوة جد ولو لمرة واحدة في حياتي.



أن يحصل حوار العريس في الوقت ده علي الأخص كان رسالة لينا نفهم  
أحنا عايزين إيه وقد إيه بنحب بعض فعلاً وكل حاجة تتغير..حتي أنا أتغير  
للأحسن معاكى، حبك نفسه غير كل حاجة سيئة جوايا...

سكتت بسنت الأم وبصلتهم وقالت بحنية:

- أبوكم يا ولاد عرفني معني الحب الحقيقي مش الحب اللي بكلمة بحبك،  
عرفني أن لا الحب مش في الأساطير بس، عرفني يعني إيه حد معايا  
وجنبي في اي وقت أحتاجه فيه ومن غير ما الجأله يكون موجود، عرفني  
يعني إيه في راجل في حياتي أبقى معتمدة عليه وكل حاجة بخرجها من  
جوايا عنده حتي لو تافهة ويسمعني بحب وإهتمام، عرف يحتويني  
ويطبطب علي قلبي من أي زعل ويمحي أي هم ولو ثقيل بيثيله معايا، كان  
ومازال طول الوقت حنين معايا وبيعاملني كأني بنته..شوفوا انتوا ولادي  
ازاي! أه أنا لحد الآن بحس معاه أنني عيلة مش عارفة اتصرف من غيره  
ولا احس بأمان غير لما يكون موجود...كان زعله وحش أوي وعمر ما حد  
اتحمل زعله بس أنا كنت بعرف أمتص غضبه وغضبه اللي بيوصلني  
بيتحول لعياط ولما كنت بعيط كان بيتحول لطفل خايف ويزعل من نفسه  
عشان زعلني ويراضيوني وخلصت المشكلة!

محمد لما دخل حياتي كان وجوده رسالة مخفية من ربنا ليا تقولي أن الحياة  
فيها حب، وفيها رجالة بجد، وفيها أمان فعلاً...

قالت فرح بابتسامة:

- ياه يا طنط، قصتكم حلوة أوووي، أنا حاسه أنني بسمع قصة متألفة او  
حكاية مش قصة حضرتك وعمو.

بصلها يونس بتكشيرة مصطنعة وحط إيديه الاتنين في وسطه وقالها:

- ياسلام ياختي ليه مش معيشك انا في قصة حب وعمال أجيبلك بيتزا ليل  
نهار لما بتزعلي؟

ضحكوا كلهم، وضحكت بسنت وهي بتعدل نضارتها الطبية وقالتله:  
-نفس حركات ابوك الطفولية...يعني مش كفاية نسخة من الشكل كمان  
هيبقي حركاته!

سألت أحلام أخت محمد وهي بتعدل حجابها وتدخل جواه شوية الشعر  
البيض الهارين منه:

-بس أنتي ما قتلناش برضه أنتي عزمانا علي إيه؟ وحفلة إيه دي اللي  
معمولة مفاجأة لمحمد والنهارده أصلاً عيد ميلادك أنتي؟  
يعني المفروض أنه هيجي من بره يلاقينا بنفاجئه هو بعيد ميلادك وعاملنه  
هو الحفلة؟ أنتي بتقولي إيه أنا مش فاهمة حاجة؟

ضحك الكل من طريقة كلام العمه أحلام الفكاهية وتساءلوا كلهم علي نفس  
الشيء، بصت في الساعة وهمست وهي بتقوم تقف بصعوبة:

-هووسسس هيفتح الباب هو وسيف كمان دقيقة، طفوا النور بسرعة  
واستخبوا..

قاموا كلهم من مكانهم واستخبوا، طفوا النور وولعوا الشموع حوالين  
التورثة المتغطية، بعد ثواني قليلة سمعوا صوت مفاتيح بتفتح باب الشقة،  
الباب بيتفتح، بيقف محمد بشعره اللي اتمرد عليه الشيب، وملامحه اللي  
بيعانده تجاعيدها الزمن، واقف جنبه سيف خطيب منه وهو بيحاول يصطنع  
المفاجأة، متفاجئ محمد وبيخطي خطواته بحذر ويبص يمين وشمال ينادي  
عليهم وماحدث بيرد، وصل للترابيزة اللي عليها الشموع وشيء مستطيل  
كبير متغطي، وقفوا الاتنين قدام الشيء المتغطي، محمد همس بمرح:

-واد يا سيف تكونش الوليه مراتي عملالي ده فخ وبتحاول تفكرني بعيد  
ميلادها علي اساس اني ناسيه وكده؟

بصوت عالي بص يمين وشمال وبيدور عليها وبيضحك ويقول:

-لااا علي فكرة مش انا اللي انسي لاااا، أنا جايب هديااه، هaaa صارف  
ومكلف وجااايب هدياااه...

خرجت من جوا المطبخ وهي بتضحك وكلهم بيخرجوا من ورا الستاير  
والكراسي ويضحكوا، وقفوا حواليه وهي وقفت قدامه ولسه فرق الطول  
مابينهم محسسينها بأنها الأقرب لقلبه، بصتله بحنان وقالتله:

-أنا هديتي أخذتها منك من 25 سنة وهي كانت أنك وفيت بوعدك الثاني،  
يومها جيت وقتلي النهارده ليكي هديتين، الأولي هي حوض السمك اللي  
كان نفسي فيه، والثانية كان خبر أنك بقالك 5 شهور مبطل سجاير وبتوفي  
بوعدك الثاني....

النهاردة أنا بحتفل ب25 سنة و5 شهور علي أنك وفيت بوعدك، وأني كل  
سنة بتمر من عمري أنت فيها ومعايا ومش خايفة عليك تتخلي عني  
بالسجاير...

شالت الغطا عن التورتة وشالتها وسط نظرات الكل وفرحتهم وضحكهم،  
مدت إيديها بيها ليه علشان يقطعها، بصوا كلهم للتورتة وضحكوا كانت  
علي شكل علبة سجاير كبيرة وعليها صورة محمد بدل التحذير، مسك  
السكينة وبصلها بحنان وقالها:

مش عارف أقتلك بالسكينة دي علي الأهانة اللي عملاها في التورتة دي،  
ولا أقولك أني كل سنة بتعدي أنا بحتفل بأني أختارت صح... لا أنا ربنا  
بيحبني أووووي وهو اللي أختارلي صح، أنتي أعظم انتصار في حياتي  
والله ♥

قطعوا التورتة، وضحكوا، وأكلوا، لعبوا وهزروا كأنهم كلهم أطفال،  
انسحبت منه بهدوء للباكونة وسرحت، دخلها سيف وقف جنبها، لاحظ  
شرودها فسألها باهتمام:

-مالك يا حبيبتي؟

-سيف...أنت ليه بتتخلي عني؟

اتصدم سيف من سؤالها، وقالها بصدق:

- إيه اللي بتقوليه ده يا منه؟ أنا ليه؟ عملت إيه عشان تقولي كده؟

بصنله وفي عينيها دموع وقالتله:

-أنت بتشرب سجاير، والسجاير هتبعذك عني، أنت عارف ضرر السجاير وفاهم أنك ممكن تتئذي في أي لحظة، ممكن تمشي بدون مقدمات بسببها، ومع ذلك مكمل فيها...كل سيجارة بتشربها بتبعذك خطوة عني...أنا مش هقدر أعيش من غيرك يا سيف ماتسبنيش..

بصلها باستغراب وضيق وسألها:

-بس أنتي عمرك ما قلتيلي كده، عمرها ما ضايقتك عشان كده ما فكرتش أبطلها، أشمعي دلوقتي؟

--أوقات بتيجي حاجات صدفة تتحط في طريقنا بتبقي رسايل مخفية لينا، نفهم بيها حاجة كان لازم نفهمها، أو تحذير لينا، أو تكون درس يعلمنا، أو يمكن قلم يفوقنا...وأنا فوقت، فوقت متأخر بس المهم أني فوقت وعايزاك ماتسبنيش...

مسح دموعها وطلع علبة السجاير من جيبيه والولاعة وحطهم في أيديها وقالها بابتسامة:

-وأنا مستعد استغني عن الدنيا بحالها وأنتي لأ..

ضحك وقالها:

-بس مش هتنازل عن أن يتعملي حفلة زي بتاعة عمو دي...بس من غير  
تورتة والنبي

ضحكت وهي بتمسح دموعها وتبصله بطمأنينة، ومن بعيد واقف محمد  
محاوطة بسنت بدراعه، بصوا لبعض بابتسامة، غمز لها محمد وهمس لها:

-عيب عليكى، خططي ماتخرش المياه..

تمت بحمد الله 